

清
史
稿

循吏傳一之四

第一百十三册



循吏

清初以武功定天下日不暇給世祖親政始課吏治詔嚴舉劾樹之風聲聖祖平定三藩之後與民休息拔擢廉吏如于成龍彭鵬陳瓊郭琇趙申喬陳鵬年等皆由縣令洊歷部院封疆治理蒸蒸於斯爲盛世宗綜覈名實人知奉法乾隆初政循而勿失國家豐亨豫大之休蓋數十年吏治修明之效也及後權相用事政以賄成蠹國病民亂萌以作仁宗矯之冀滌瑕穢道咸以來軍事興而吏治疏同治中興疆吏賢者猶能激揚清濁以彌縫其間然保舉冒濫捐例大開猥雜不易爬梳末造財政紊亂新令繁興簿書期會救過之不遑又遷調不時雖有潔己愛民者亦不易自舉其職論者謂有清一代治民寬而治吏嚴其敝也奉行故事實政不修吏道媮而民生益蹙迨紀綱漸隳康雍澄清之治邈焉不可見觀此誠得失之林也明史所載以官至監司爲限今從之尤以親民爲重其非由守令起家者不與焉

循吏一

白登明

湯家相
子宗堯

任辰且

宋必達

陸在新

張沐

張燾

陳汝咸

繆燧

陳時臨

姚文燮

黃貞麟

駱鍾麟

崔宗泰

祖進朝

趙吉士

張瑾

江皋

張克嶷

賈樸

邵嗣堯

衛立鼎

高蔭爵

崔華

周中鉉

劉榮

陶元淳

廖冀亨

佟國瓏

陸師

張鑑

白登明字林九奉天蓋平人隸漢軍鑲白旗順治二年拔貢五年授河南柘城知縣時大兵之後所在萑苻嘯聚登明治尙嚴肅禽諸盜魁按以法境內晏然憫遺黎荒殘多方招撫停止增派河夫設條以勸耕讀十年考最擢江南太倉

知州釐賦稅除耗羨雪諸冤獄訪察利弊所摘發輒中隣境有冤抑赴愬上官輒願下州爲理海濱居民因亂蕩析登明召民開墾復成聚落是年九月海寇犯劉河堡登明盡力守禦寇不得逞遂退十六年海寇破鎮江由江甯敗走急攻崇明巡撫蔣國柱治兵策應欲遣告師期莫敢前登明獨駕一艘夜半往緹城入衆知援至守益力寇乃遁劉河北支有朱涇者宋范仲淹新塘遺跡也久淤塞登明請於上官疏鑿五十里巡按李森先知其能復令大開劉河六十里於是震澤在北諸水悉導入海旱潦有備爲一郡利先是寇急時需餽無出以雲南協餉應之卒爲大吏所劾落職州民列治狀請留弗得坐廢二十餘年康熙十八年會臺灣用兵福建總督姚啓聖巡撫吳興祚素知登明代爲入貲疏薦起授高郵知州值歲旱蝗繼而大水湖漲決清水潭築隄禦之嚴禁胥吏尅減役者踴躍從事次年復災再請蠲賑勸富民分食全活無算時三藩初平軍檄猶繁登明與民約凡供億驛夫聞吹笳而至免奪民時上官有所徵調不輕給然皆諒其清廉亦無相督過者以積勞卒官貧無餘資州人醵金以殮入祀

名宦祠鄉民多肖像立祠私祀焉時江南以良吏稱者湯家相任辰日于宗堯皆與登明相先後云家相字泰瞻山西趙城人順治六年進士八年授常熟知縣潔己愛民釐剔耗蠹撫恤凋殘善政具舉前令被劾逮問家相左右之力白其誣以是忤巡按御史時江南逋賦數百萬嚴旨奪各官職家相坐免士民爭先輸納不踰宿而額足且以治狀訴大吏請留勿獲既而給事中周之桂疏上其事十三年起授湖北南漳縣縣居萬山中寇盜窟穴時出肆掠戕官人咸危之家相下車即令堅壁清野寇大至家相謂同城守備曰寇衆我寡當效羅士信破盧明月法可勝密授方略寇果墮伏中遂擒其魁黨馬成孫信輩斬首數百級寇大創遠遁於是招流亡修學校教養兼施墾田六百餘頃築永泉八觀諸堰民賴其力邑以大治疆吏交章薦之以病乞歸辰日字千之浙江蕭山人順治十三年進士康熙初授上海知縣清苦自勵敏於聽斷數決疑獄豪猾斂迹催科以時不大用鞭朴百姓感其仁輸納恐後瀕海防軍將撤密請行期故邀軍主歡飲宣言期須少緩次日令下促急行乃厚其牛酒道上勞軍軍無敢

遷延他顧居民帖然黃龍浦爲吳淞江入海要口建閘屢圯故事修閘必築壩費不貲辰旦仿浙人爲梁法度基廣狹約丈尺伐石識其甲乙下之水使善泅者厝之悉中程復廣左右護隄約水就道十閱月而工成不病役不糜帑邑人頌之縣田沒水者六千畝賦額未除輸者率破家前令屢勘虛實貿亂至是巡撫慕天顏疏請復勘辰旦喜曰是吾志也日往來泥沙中按舊冊履丈釐其荒者閱二月費皆自辦俸不足出銀釧棉布償之籍上得減除額征有差十八年舉博學鴻儒放還故官復以良吏薦入爲給事中論事切直改大理寺丞母憂歸旋以前廷推事註誤落職卒於家宗堯字二巍漢軍正白旗人廣西總督時隴子以廕入監讀書康熙七年授常熟知縣年甫十九興利除弊勇於爲治老於吏事者勿逮也時漕政積弊糧皆民運往往破家宗堯議定官收官兌之法重困得甦其徵糧則戒期令各自輸胥吏莫由上下其手民便之興文教戢豪強救荒療疫皆以誠懇肫摯出之四年如一日以勞致疾卒於官年二十有三耳民爲罷市釀金發喪遂葬之虞山南麓題其阡曰萬民留葬

宋必達字其在湖北黃州人順治八年進士授江西寧都知縣土瘠民貧清泰懷德二鄉久罹寇民多遷徙地不治請盡蠲逋賦以來之二歲田盡闢縣治瀕河夏雨暴漲城且沒禱於神水落按故道疏治之自是無水患康熙十三年耿精忠叛自福建出攻掠旁近地江西大震羣賊響應寧都故有南北二城南民北兵必達曰古有保甲義勇弓弩社民皆可兵也王守仁破宸濠嘗用之矣如其法訓練得義勇二千及賊前鋒薄城下營將邀必達議事曰衆寡食乏奈何必達曰人臣之義有死無二賊本烏合掩其始至可一鼓破也營將遂率所部進賊少却必達以義勇橫擊之賊奔己而復率衆來攻巨礮墮雉堞輒壘補其缺隨方備禦益堅會援至賊解去或言於巡撫縣堡砦多從賊巡撫將發兵必達刺血上書爭之乃止官軍有自汀州還者婦女在軍中悲號聲相屬自傾橐計口贖之詢其姓氏里居護之歸縣初食淮鹽自明王守仁治贛改食粵鹽其後苦銷引之累必達請以粵額增淮額商民皆便卒以粵引不中額被論罷職寧都人哭而送之餞貽皆不受間道赴南昌中途爲賊所得脅降不屈繫旬有

七日忽夜半有數十人持兵踰垣入曰宋爺安在吾等皆甯都民擁而出乃得脫既歸里江西總督董衛國移鎮湖廣見之歎曰是死守孤城者耶吾爲若咨部還故職且以軍功敘必達遜謝之既而語人曰故吏如棄婦忍自媒乎褐衣疏食老於田間甯都人歲時祀之越數年滇寇韓大任由吉安竄入甯都境後令萬蹶生踵必達鄉勇之制禦之卒保其城云陸在新字文蔚江南長洲人康熙五年以策論取士在新夙講經濟遂得舉除松江府教授教諸生以質行爲先其以金贄者却之用不足知府魯某分俸助之巡撫湯斌察其廉勤以卓異薦是歲江南七府一州諸長吏被薦者獨在新一人時以此服斌之知人二十年擢江西廬陵知縣嚴重有威境內貼然誓不以一錢自污錢穀耗羨革除都盡傍水設五倉便民輸納建問苦亭於衙西訪求民隱時裹糧厯山谷間勞苦百姓軫其災患而導之於善召諸生考德論藝如爲校官時設四門義學刻孝經小學頒行之二十六年江溢民多溺在新急出錢募民船往救躬自倡率出入洪濤中全活無算以受前官虧帑盈萬無所抵憂卒初赴官時子孔奐在

京師蹙然曰吾父此行必殉是官矣亟從之卒之日嚮書數篋以歛廬陵人爲罷市三日請祀名宦祠長洲人亦以鄉賢祀之

張沐字仲誠河南上蔡人順治十五年進士康熙元年授直隸內黃知縣縣苦賦役不均沐令田主自首不丈而清嚴行十家牌法奸宄斂迹大旱自八月不雨至明年九月民飢甚沐力籌賑捐資爲倡勸富民貸粟官爲書其數俟秋穫取償人爭應之民免轉徙沐爲政務德化令民各書爲善最樂四字於門以自警著六諭敷言俾人各誦習反覆譬喻雖婦孺聞之莫不欣欣嚮善五年坐事免十八年以左都御史魏象樞薦起授四川資陽縣途出內黃民遮道慰問日行僅數里既抵任值吳三桂據瀘州相去數百里羽檄如織城中人戶不滿二百沐入山招撫量爲調發供夫驛不缺滇事平以老乞休沐自幼勵志爲聖賢初官內黃講學明倫堂講業恒數百人湯斌過境與語大悅遺書孫奇逢稱其任道甚勇求道甚切沐因以禮幣迎奇逢至內黃講學俾多士有所宗仰及在資陽供億軍興之暇猶進諸生誨導不倦退休後主講沐中兩河之士翕然歸

之多所成就年八十三卒沐之自內黃罷歸也值登封令張堽興書院借耿介同講學爲文紀其事一時稱盛堽字牖如江蘇長洲人以官學教習議敘知縣康熙十七年授登封縣單騎之任途中與登封吏同宿逆旅吏不知也至縣三日拜嶽誓不取一錢不枉一人衙前樹巨石鐫曰永除私派設櫃民自封投無羨折招集流亡督之耕種相其土宜課植木棉及諸果實大修學宮復嵩陽書院宋四大書院之一也延耿介爲之師導諸生以程朱之學自縣治達郊鄙立學舍二十一所課童子以時巡閱正句讀導之以揖讓進退之禮間策蹇驢歷諸郊問所苦有小爭訟輒於阡陌間決之西境有呂店者俗好訟堽察里長張文約賢舉爲鄉約俾行化導澆風一變里長申爾瑞負課且受杖路拾人輸稅金反之甯受責不利人財堽義之旌其門鄉民高鵬舉死妻孟年少舅欲強嫁之孟哭夫墓將自縊堽適微行問其故給以銀米勸還家而免其徭歲時存問俾終其節縣故多胥役時獄訟日尠姦僞無所容諸胥多自引去其更番執事者退則操耒耜爲農以在官無所得錢也開嵩嶺二百里復古轅轅路建古賢

令祠修鄢公墓崇禎末爲令守城抗賊死者也在官五年民知向方生聚日盛大書官清民樂於門耿介嘗歎曰年來嵩洛間別一世界矣二十二年以卓異荐擢廣西南甯通判去之日民遮道哭立祠於四鄉肖像祀焉榜曰天下清官第一至南甯未幾乞歸母喪服除赴京師卒

陳汝咸字華學浙江鄞縣人少隨父錫嘏講學證人社黃宗羲曰此程門之楊迪朱門之蔡沈也康熙三十年會試第一成進士選庶吉士散館授福建漳浦知縣民好訟嚴懲訟師無敢欺者縣中賦役故責戶長主辦版籍混淆吏緣爲奸汝咸躬自編審人丁各歸現籍糧戶自封投納用滾單法輪催以三百戶爲一保第其人口多寡供役五年一編丁而役法平吏胥以不便撓之大吏搖惑汝咸毅然不回奸人無所施技民樂輸將賦無逋負俗輕生多因細故服斷腸草死挾以圖財力懲其弊令當刑者掘草根贖罪禁舁神療病曉示方證自製藥以濟貧者毀學宮伽藍祠葺故儒陳眞晟周瑛高登諸人所著書表章之歸誠書院乃黃道周講學地爲僧據逐而新之無爲教者男女羣聚茹蔬禮佛籍

其居爲育嬰堂西洋天主教要大吏將於漳浦開堂卻止之修文廟造祭器時會邑中士紳於明倫堂講經史性理諸書設義學延諸生有學行者爲之師修朱子祠教養兼施風俗爲之一變會大水驟漲幾及城堞輿錢登城多爲木筏渡一人與錢三十人皆以錢助拯活者數千多方撫卹雖災不害土寇伏七里洞將入海發兵擊之走山中密招賊黨誘禽其渠曾睦等餘黨悉散又禽海盜徐容盡得賊中委曲赦其罪責以招撫諸盜歸誠海氛遂清汝咸任漳浦凡十有八年大吏因南靖多盜調使治之縣民請留不得構生祠曰月湖書院歲時祀之汝咸至南靖諸盜自首就撫開示威信頌聲大作四十八年內遷刑部主事擢御史疏言商船出海掛號無益徒以滋累又言海賊入內地必返其家下海劫掠責之巡哨官未下海之蹤迹責之本籍縣令當力行各澳保甲會海盜陳尙義乞降汝咸自請往撫聖祖命郎中雅奇偕汝咸所薦阮蔡生往尙義率其黨百餘人果就撫擢通政使參議五十二年奉使祭炎帝神農帝舜陵並頒賚駐防兵徧歷苗疆審度形勢撫馭之策歷鴻臚寺少卿大理寺少卿五十三

年命赴甘肅賑荒徒步窮鄉感疫卒於固原漳浦士民聞之奔哭於月湖書院
釀金置田歲祀不絕著有兼山堂遺稿漳浦政略諸書

繆燧字雲曜江蘇江陰人貢生入貲爲知縣康熙十七年授山東沂水縣時山
左饑朝使發賑將購米濟南燧以路遠往返需日且運費多不便請以銀給民
自買當事以違旨勿聽燧力爭以因地制宜之義代草疏奏請得允旣而帑金
不足傾囊以濟之洊饑之後民多流亡出私錢爲償逋欠購牛種招徠復業因
捕劇盜已獲復逸被議歸尋復官三十四年授浙江定海縣故舟山也設治未
久百度草創海水不宜穀築塘岸以禦鹹蓄淡修復塘堰百餘所田日增闢繕
城濬濠葺學宮建祠廟役繁而不擾地瘠民貧完賦不能以時踰限者先爲墊
解秋後輸還舊有塗稅出自漁戶網捕之地後漁塗被占苦賠累爲請罷之地
故產鹽無竈戶鹽運使屢檄設廠砌盤官爲收賣燧持不可請仿江南崇明縣
計丁銷引歲完鹽稅銀四十二兩有奇著爲例學額多爲外籍竄冒援宣平縣
例半爲土著半令他縣人認墾入籍以充賦又以土著不能副額擴建義學增

廩額以鼓舞之文教興焉民間日用所需多航海市諸郡城關胥苛索請永禁立石海關海嶼爲盜藪隨監司厯勘凡羊衝下八盡山花腦玉環半邊牛韭諸島權度要害措置之盜風頓戢同歸域者海上死事諸人瘞骨處捐貲修葺建成仁祠以勸忠義厯權慈谿鎮海鄞縣及甯波府事皆有惠政擢杭州府同知未任五十六年卒於定海士民援唐王漁宋趙師旦故事留葬衣冠奉祀於義學名之曰蓉浦書院蓉浦燧自號也遺愛久而不湮光緒中復請祀名宦祠燧任定海前後二十二年賜四品頂戴賜御書後雖擢官迄未離任時朝廷重守令循良多久於其職陳汝咸治漳浦十有八年陳時臨治汝陽亦二十年一邑利病無所不知視如家事故吏治蒸蒸日上云時臨字二咸浙江鄞縣人少從陳錫嘏學得聞證人書院之教家貧游京師三藩之變從軍敘功授湖南城步知縣父憂歸廬墓三年康熙三十年起授河南汝陽縣兵亂之後風俗大壞民不知喪禮時臨爲斟酌古今所可通行者衰絰聚飲之風以息楊埠有支河久淤濬復其舊民獲灌溉之利河南諸縣多食蘆鹽獨汝寧一郡食淮鹽蘆商欲

并之時臨謂蘆鹽計口而授不問其所需之多寡以成額給之是厲民也吾不能謂河南盡革其害反徇商人意以害境內乎力爭得止巡撫徐潮亟稱之於是前後諸大吏皆以爲循吏當令久任數報最數留之時臨亦與民相安於無事後擢兵部主事宦橐蕭寥臨行百姓扶老載弱相送數十里逾年以病乞歸卒

姚文燮字經三安徽桐城人順治十六年進士授福建建甯府推官建甯俗號獷悍以睚眦讎殺者案山積文燮片言立剖未數月囹圄爲空有方秘者殺方飛熊前令已讞定大辟文燮鞫得飛熊初爲盜嘗殺秘一家旣就撫秘乃乘間復讎不可與殺平人等秘得活大吏謂文燮明允凡疑獄輒委決之有武弁被殺株連衆文燮僅坐數人罪大吏駭曰此叛案何遽輕率文燮曰某所據初報文及盜供也蓋鄉民逐盜弁適遇之從騎未至爲盜所殺而盜逸營中執爲民叛殺弁文燮檢得初報文而盜亦獲自供殺弁故得其情時耿氏建藩其下多怙勢虐民貸民錢而奪其妻女文燮悉使訐發爲捐募代償贖歸百數奉檄主

丈田事建寧環郡皆山民依山鑿田每陡峻不能施弓繩文燮授吏勾股法計田廣狹增減爲畝區畫悉當值邊海修戰船或擬按戶口出錢文燮上陳疾苦籌款以代民乃安秩滿報最康熙六年詔裁各府推官去職八年改直隸雄縣知縣渾河泛溢浸城文燮修城築隄造橋利涉者邑貢狐皮爲民累條上其弊獲免地近京畿膏腴多圈佔爲旗產文燮爲民爭之旗人請於戶部遣司官至牽繩量地繩所及民不得有文燮拔刀斷繩司官見其剛直詞稍遜未幾有旨退地還民團練屯丁以資守望盜賊屏迹報墾地蠲耗羨減鹽引恤驛政拊循瘡痍民慶更生擢雲南開化府同知攝曲靖府阿迷州事吳三桂叛文燮陷賊中密與建興將軍林興珠有約爲賊所覺被繫乘隙遁謁安親王岳樂軍中王以聞召至京賜對詢軍事甚悉滇寇平乃乞養歸黃貞麟字振侯山東卽墨人順治十二年進士十八年授安徽鳳陽推官嚴懲訟師閤郡懷然大旱禱雨未應貞麟曰得無有沈寃未雪上千天和乎於禱雨壇下立判諸大獄三日果雨江南逋賦案興蒙城懷遠天長盱眙各逮紳民百餘人繫獄候勘獄不能容人

皆立貞麟曰彼逋賦皆未驗實忍令僵死於獄乎悉還其家及訊則或舞文吏
妄爲注名或誤報或續完悉原而釋之保全者五百家河南優人朱虎山游食
太和髮長數寸土猾范之諫與咎姓有隙誣以藏匿故明宗室謀不軌事發江
甯推官不敢問以委貞麟貞麟力白其誣逮至京師復勘刑鞫無異乃釋咎姓
而治之諫罪潁州民吳月以邪教惑衆株連千餘人貞麟勘多愚民無知止坐
月及爲首者捕人索財於水姓不得指爲月黨追至新蔡殺之鄉人來救並誣
爲月黨撫鎮發兵圍之繫其衆至鳳陽貞麟廉得實懲捕而盡釋新蔡鄉人其
理枉活人類如此旋以他事解官得白康熙九年改授直隸鹽山知縣地瘠而
多盜立法牌甲互相救護有警一村中半守半援盜日以息清里役逃亡者悉
與豁除不期年流民復業數百家十二年旱謂父老曰大吏使勘災者至供給
惟官是責不費民一錢及秋徵吏仍以舊額進貞麟曰下輸上易上反下難待
准蠲而還之反覆間民必受損立令除之又永革雜派陋例民皆感惠內擢戶
部山西司主事山西聞喜丁徭重力請減之監督京左右翼倉因失察侵盜罷

職卒於家

駱鍾麟字挺生浙江臨安人順治四年進士副榜授安吉學正十六年遷陝西
盩厔知縣爲政先教化春秋大會明倫堂進諸生迪以仁義忠信之道增刪呂
氏士約頒學舍朔望詣里社講演訪耆年有德孝弟著聞者見與鈞禮歲時勞
以粟肉立學社擇民間子弟授以小學孝經飭保伍修社倉莅獄明決所案治
即勢豪居間莫能奪人畏而愛之縣城去渭不十里鍾麟行河畔知水勢將南
侵議自覽家寨迤東開復故道衆難之康熙元年夏大雨渭南溢且及城齋沐
臨禱自跪水中幸雨止水頓減徙而北流者數里兼攝興平鄠兩縣興平豪右
分爲部黨前令不能治廉得其狀收案以法奏最內遷北城兵馬司指揮復出
爲西安府同知八年擢江南常州知府常州縣賦重科條繁多吏緣爲奸鍾麟
立法鉤稽清逋吏受成事而已屬邑歲例餽漕羨三千金鍾麟曰利若金如吾
民何峻却之諸漕卒咸斂手奉法初鍾麟在盩厔以師禮數造李顒廬至是創
延陵書院迎顒講學率僚屬及薦紳學士北面聽問爲學之要顒曰天下之治

亂在人心人心之邪正在學術人心正風俗移治道畢矣鍾麟書其言終身誦之已而江陰靖江無錫諸有司爭禮致頤頤爲發明性善之旨格物致知之說士林蒸蒸向風吏治亦和九年大水發倉廩勸富人出粟賑民無荒亡十年夏大旱葛衣草履步禱不應責躬籲天言知府不德累民涕泣並下尋丁母憂士民乞留不可旣歸連遭父喪以毀卒郡人論賢有司知治體必首推鍾麟先鍾麟守常州者祖重光崔宗泰皆有名其後有祖進朝政聲尤著重光官至天津巡撫宗泰奉天人順治初授松江府同知以敏幹稱擢常州知府政尙嚴厲善鉤距吏民驚爲神明十三年大兵征閩過郡久駐人情恆擾宗泰先期儲待織悉備具有游騎入村落逐婦女溺水死宗泰夜叩營門白將軍縛置之法時時單騎巡行遇小有剽奪隸傳呼崔太守來皆引避去民得安堵令甲府漕以推官監兌推官儒而衛弁橫宗泰自請於漕督檄之監兌盛騶從帶刀韃臨倉弁卒悚懼竟事無譁尋以事左遷福建延平府同知後乞免歸進朝亦奉天人以蔭監起家康熙二十三年由部郎擢授常州知府有惠政以失察鑿級去士民

呼籲於巡撫湯斌請留進朝斌上疏言進朝履任未一載操守廉治事勤臣私心重之頃緣失察法寶事降調常州五縣士民輒號泣罷市赴臣請留日不下數千人臣諭以保留例已久停士民謂常州四十年未有愛民如進朝者其減絲輕耗興學正俗戢奸除暴息訟安民窮鄉僻壤盡沾惠澤朝廷軫念東南如江甯府知府于成龍特恩超擢吏治丕變進賢操守才幹可與成龍頡頏而獨以一眚被謫士民攀留言之泣下臣不知進朝何以感人之深如此臣受事四日始獲法寶是受事之日已爲失察之日且當候處分何敢代人瀆奏惟臣蒙恩簡畀封疆大任屬吏之敗檢者得糾劾之廉能者不能爲之一言非公也民情皇皇如是而不爲之解慰安輯非仁也畏罪緘默而使輿情不上聞非忠也敢據情陳奏章下部議格不行聖祖諭曰設官原以養民湯斌保奏祖進朝清廉百姓同聲懇留可從所請以勸廉吏進朝復任未幾以老疾乞免民恆思之不置云

趙吉士字天羽安徽休甯人寄籍杭州順治八年舉人康熙七年授山西交城

知縣縣居萬山中地產馬饒灌木時禁民間牧馬停南堡村木廠民困往往去爲盜武弁路時運貪而擾民民殺時運作亂與大同叛將姜瓖合連破諸邑及瓖誅餘盜匿山中吉士到官定先撫後勦之策有投撫者給示令招其黨誦知羣盜陰事選鄉兵得技優者百人令紳戶家出一丁與民均役分夕巡城行保甲法匿賊者連坐隣盜相戒不入境時交城多抗賦河北都者賦倍他都吉士往諭朝廷德意勗以力耕勿爲盜衆悚息日暮寢陶穴中聽訟左右多賊黨吉士陽若勿知詰朝深入察其形勢最險者曰三坐厓東西兩葫蘆川繞其下塞葫蘆口則官軍不得登吉士默識之而還交山賊楊芳林芳清等時出肆掠九年春吉士入山勸農撫姜瓖舊卒惠崇德詢得二楊所在命二卒立擒至杖繫之賊渠任國鉉鍾斗等糾衆尾之不敢發會有陝西叛弁黃某入葫蘆川與國鉉合吉士謀間之遣山民持書付國鉉等僞誤投黃所黃得書疑國鉉等率衆去國鉉等既失黃弁無所恃有投誠意靜樂盜李宗盛踞周洪山遣其黨趙應龍劫清源吉士遣惠崇德入山說國鉉等令獻趙應龍可免罪國鉉與宗盛給

應龍縛付崇德應龍恨爲所賣盡發諸盜陰謀吉士會兵勦宗盛復遣崇德往說國鉉等使無動遂擒宗盛賊黨益渙十年廷旨下總督治羣盜期盡勦絕吉士曰交山劇賊不過十餘人其它率烏合一聞盡勦恐山中向化之民畏罪自疑反爲賊用今靖安堡初復請協兵三百以駐防爲名尅期入山可一戰禽也靖安堡者近葫蘆口三十里昔以屯兵吉士就廢壘新築之守備姚順率兵至縣吉士約期進屯先期七日置酒大享客夜半席未散吉士上馬會師疾驅四十里至水泉灘分三隊一襲東葫蘆一襲西葫蘆自偕姚順進駐東坡底爲兩葫蘆要道東西賊援並絕國鉉等爲內應呼曰官兵入山矣兩葫蘆賊皆走上三坐厓吉士遣人至厓下語之曰汝等良民毋爲賊脅官且按戶稽丁不在即以賊論衆乃稍稍去僅存二百餘人分兵要賊去路賊四竄被獲頗衆分搜巢穴縱降賊質其妻子俾捕他賊以自贖入山旬有六日盜悉平乃召山中民始終不附賊者三十七家賚以羊酒立爲約正其素不與徭役者千四百三十家編其籍入都圖自後交山無賊患吉士初患山路險阻命每都具一圖鱗比爲

大圖召父老詢徑途曲折注之以次及永甯靜樂隣縣諸山每獲賊善遇之因得諸賊蹤迹上官知其能不拘以文法用卒成功治交城五年百廢具舉內遷戶部主事監揚州鈔關擢戶科給事中忌者劾其父子異籍被黜尋補國子監學正四十五年卒祀交城名宦祠

張瑾字去瑕江南江都人康熙二年舉人十九年授雲南昆明知縣時吳三桂初平故軍衛田隸藩府者徵租量豐歉收之事平沿爲額民不能供又軍興後官司府署器用皆里下供應而取給於縣故昆明之徭尤重於賦瑾請於大吏奏減其賦不可乃疆畫荒地招流亡給牛種薄其徵以濟軍衛之賦一年墾田千三百餘畝三年得萬餘畝又均其徭里蠹無科派奸民無包收諸侵漁弊皆絕民舊供縣公費日十金瑾曰吾食祿於君不食傭於民革之總督曰陳仲子之廉能理劇乎又問今家幾何人對曰子一客與僕各二閭之信皆驚異自公費除而上之取給者亦減昆明池受四山之水夏秋暴漲怒流入閘河沙石壅塞水乃溢浸瀕池田歲勞民力濬之晉甯州境毘於昆明受東南諸箒之水舊

迹有河道入江上官議鑿之以通閘河瑾按地勢爲圖白之曰閘河獨受昆明之水已不能吐納沙石旁溢爲害豈可更受晉甯水乎且其地高若建瓴沙石犖确尤甚殆不可治臺司持之堅則指圖爭曰高下在日何忍陷民於死總督范承勳曰令言是也議遂寢縣有止善春登利城諸里田均垵錯出不旱則潦瑾廉得旁近有白沙馬裊清水三河可資蓄洩年久湮塞率民濬治三月河復田以常稔大小東門外舊皆市兵後爲墟盜賊窟其中爲創造室廬以居流亡移城中騾馬羊諸市實之貨廛牧場相比盜遂絕迹安阜園者故藩圃也請耕之以食孤貧廢疾而無告者是時上官多賢者每倚信瑾兵備道欲以流民所墾田牧馬求之期年不與久亦稱其直將軍僕殺人按察使置酒爲請陽諾之退而正其罪巡撫僕子謀奪士人聘妻即縣庭令士人行合卺禮判曰法不得娶有夫之婦婦乘我輿壻乘我馬役送之歸有奪者治其罪時人作歌詩以傳之初至滯獄以百數斷訖皆當後一省疑獄輒付瑾治屢有平反居三年病卒士民圖其像藏之請祀名宦祠

江皋字在涓安徽桐城人順治十八年進士觀政刑部父病乞養歸喪除授江西瑞昌知縣故事歲一巡鄉堡校戶籍歛輿馬費皋罷之縣城近河壩岸善崩屢決改道環城無隍民病汲皋出俸金率先衆力築堅堤濬壅塞水復其故形勢益壯民居遂蕃三藩叛縣界連湖南土寇乘間起皋曰吾民緣飢寒出此迫之則走藉寇飭鄉保長開諭撫安而密督丁壯巡察屢擒其魁盜遂息居七歲考最遷九江府同知尋擢甘肅鞏昌知府大軍入蜀治辦軍需值歲除檄徵騾馬千匹芟芻器具取具倉猝皋策畫便宜供應無缺士卒驕悍所過漁奪百姓皋遇輒縛送軍主斬以徇絲是肅然越四歲調廣西柳州時新收嶺西兵猶留鎮軍中多掠婦女皋白大吏檄營帥籍所掠送郡資遣凡數百人軍餉不繼士譁噪將變皋馳諭緩期趣臺司發餉應期至軍乃戢郡民王纘緒故官家子經亂產爲四奴所據隻身寄食僧舍皋詰得之悉逮捕諸奴奴懼納二千金乞免佯受之訊伏罪乃出金授纘緒命奴從歸盡還其產柳人歌誦之太和殿大工興使者采木民大恐長老言故明采木於此僵仆谿谷橫藉不可數皋曰上命

也何敢匿諱使者至今民前導自控騎偕使者往視巨木森挺絕巘下臨深谷
下騎掖使者攀援以登厓益峻無側足所使者咋舌曰是不可取還奏免役民
謹呼戴上恩德尋被薦提學四川以母喪解官服闋補陝西平慶道副使遷福
建興泉道參政以事左遷旋以恩復職卒於家皋於廣西聲績最著其後稱張
克嶷賈樸克嶷字偉公山西聞喜人康熙十八年進士選庶吉士改刑部主事
累遷郎中有獄連執政族人諸司莫敢任克嶷請獨任之內務府以其人出使
爲辭克嶷鉤提益急牒問奉使何地歸何期力請部長入告事雖格聞者肅然
出爲廣西平樂知府猺獞雜居盜不可詰克嶷至浹月以信義服苗酋獲巨盜
二人斃其一宥其一責以偵緝終其任盜不敢窺調廣東潮州屬縣賊蠡起或
稱明裔聚衆千餘人克嶷疾馳至其地命吏士速據白葉祁山設疑兵賊不敢
逼會夜半大風起簡健卒二百斫其營呼曰大兵至矣城中鼓噪出兵以助之
賊奔祁山要擊之斬其渠魁三人衆散乞降巡撫將上其功克嶷曰此盜耳而
稱明裔興大獄株連多恐轉生變乃以盜案結郡有大豪戕親迎者於路而奪

其妻克嶷微行迹而得之獄成當大辟監司以督撫命爲之請曰稍遼緩之當有以報克嶷曰吾官可罷獄不可鬻也卒寘諸法或假親王命以開礦縛執之其人出龍牌克嶷命繫之獄以牌申大府情旣得立杖殺之丁父憂歸遂不出年七十六卒樸字素庵直隸故城人貢生康熙二十三年授廣西柳州同知有政聲思明土屬負固抗官大吏知其能調任思明治之夜遣健卒潛入山焚賊寨遂出降署思明知府土田州岑氏母子相爭土目陸師等搆之以爲利殺人千餘樸至切諭母子俱感泣師等聚衆謀不軌先懼以兵單騎往曉以禍福乃聽命建明倫堂設義學代完寒士逋糧民立生祠奉之擢貴州平越知府呈誤去官樸在廣西嘗條上邊事巡撫彭鵬奇其才四十年詔舉廉吏鵬特疏薦授江南蘇州知府與吏民相見以誠屏絕請託政聲大起四十六年聖祖南巡幸蘇州嘉其清廉爲吳中最擢江常鎮道吳民數千人遮道請留賢守御書宜民匾額賜之調蘇松常鎮太糧儲道布政使參政仍兼管蘇州府事從民願也革四府徵糧例規積弊一清忤總督噶禮撫事劾之四十九年去官留吳門三年

歸里卒

邵嗣堯字子昆山西猗氏人康熙九年進士授山東臨淄知縣有惠政以憂去十九年服闋補直隸柏鄉興水利減火耗禁差擾民安之縣人大學士魏裔介爲嗣堯會試座主家人犯法嚴治之不少貸又有旗丁毒毆子錢家入縣庭勢洶洶嗣堯不稍屈繫之獄移文都統訊主者主者不敢承具論如法值歲饑或言勸積粟家出粟嗣堯曰人惟不積粟故歲饑則束手吾方蘄令積粟家獲厚利何勸爲已而獨粟者衆歲不爲災有言開遙陽河通舟楫者巡撫于成龍使嗣堯往相度嗣堯力持不可謂此河旱潦不常未可通舟楫即或能通恐舟楫之利歸商賈挑濬之害歸窮民矣事遂寢盜殺人於縣界立捕至置之法或毀於上官以酷刑奪職尙書魏象樞奉命巡視畿輔民爲申訴事得白于成龍復薦之補清苑嗣堯益感奮自勵屢斷疑獄人以包孝肅比之二十九年尙書王鷺薦嗣堯清廉慈惠行取擢御史三十年出爲直隸守道持躬清介苞苴杜絕遇事霆發機激勢要憚之所屬州縣肅然奉法三十三年江南學政缺聖祖諭

曰學政關繫人材朕觀陸隴其邵嗣堯操守學問俱優若以補授必能秉公校士革除積弊時隴其已卒遂命嗣堯以參議督學江南既蒞事虛衷衡校論文宗尚簡質著四書講義傳示學者甫試三郡以積勞遘疾卒身無長物同官歛資致賻乃得歸葬士民思之爲立祠肖像以祀焉聖祖澄清吏治拔擢廉明近畿尤多賢吏如彭鵬陸隴其及嗣堯當時皆循名上達聞於天下鵬及隴其自有傳又有衛立鼎高蔭爵靳讓治績亦足媲美立鼎字慎之山西陽城人康熙二年舉人授直隸盧龍知縣地當兩京孔道驛使旁午供張糗糈悉自營辦不以擾民先是縣中徵糧勺杪以下皆用升合量納草以銀代仍抑價買諸民間立鼎令輸戶含納奇零統歸斛斗徵草則以本色輸民甚便之興行教化獎拔士類不變其俗尤以清廉著稱尙書魏象樞及侍郎科爾坤奉命巡畿內至盧龍已治具不肯食僅啜一甌曰令飲盧龍一杯水耳吾亦飲令一杯水諸大獄悉以咨之立鼎引經準律象樞大稱善于成龍之巡撫直隸也嘗迎駕於霸州奏舉循吏以立鼎陸隴其並稱嗣巡撫格爾古德以事至盧龍謂立鼎曰令之

苦無異秀才時秀才徒自苦今令苦而百姓樂非苦中之樂乎疏薦立鼎治行
第一靈壽令陸隴其次之內遷戶部郎中秩滿授福建福州知府以年老致仕
歸教授鄉里以倡論道學爲事年七十有六卒蔭爵字子和奉天鐵嶺人隸漢
軍康熙初謁選授直隸蠡縣知縣縣多旗屯居民田之半佃者倚勳貴爲奸利
持吏長短河數決孟嘗村歲比不登民大饑蔭爵至曰吾未暇理他政且活民
倉有粟二萬石請發以賑牘再上不許請解官乃許之五千石蔭爵曰若今歲
又惡民不能償二萬石五千石等死耳吾且活吾民乃盡發之更出帑五百金
貸民種麥夏旱蝗起捕蝗盡秋又大霖雨河暴溢率吏民冒風雨捍禦堤完而
歲大熟民乃安某甲以財雄諸佃多爲不法誣諸生爲奴而籍其田按治得實
置之法豪猾懾服莫敢犯令於是設義倉置鄉學尊禮賢士民大和悅調三河
一以簡易爲治或問之曰前令已治矣何紛更爲前令彭鵬也聖祖校獵至三
河問父老高令與彭令孰賢對曰彭廉而毅高廉而和上稱善擢順天府南路
同知于成龍問以捕盜方略條上三事略言盜旗屯爲逋逃藪請嚴保甲首實

之令使無所匿而平日能使之衣食粗足則可不至爲盜成龍躡之會丁父艱歸成龍總督南河築界首隄以屬蔭爵隄成上南巡閱工召見賜克食起復補湖北德安府同知累擢四川松茂道直隸口北道皆有惠政卒於官子其倬官至大學士自有傳讓字益庵河南尉氏人康熙十八年進士授浙江宣平知縣旱災請蠲甚力巡撫張鵬翮以爲賢父憂去服闋授山西汾西會親征漠北供張杜絕擾累民力不足請以正賦辦治行取擢御史數上疏言察吏安民實行教養聖祖諭曰朕御極四十年惟冀天下黎庶盡獲安全邊疆無事如靳讓所言必令家給人足無一人凍餒此非朕所可必者恐其不過徒爲大言曩者錢珏衛旣齊亦曾爲此言及後用爲大吏皆不能自踐其語靳讓曾爲縣令其所爲能如是乎通州驛馬事繁著調爲通州知州果能如所言朕即超用上意欲試之也許其便宜啟奏讓布衣羸馬之官皇莊旗莊恣肆病民繩以法不少貸私錢私鑄悉禁止時禁河捕魚誣累平民讓分別治之奸商藉權貴勢謀專賣麥豆及設薑肆牟利並拒絕上聞皆躡之會學政更替命九卿舉所知上曰朕

亦舉一人命以僉事督學廣西逾年調浙江除弊務盡教士先德行而後文藝
值南巡召對褒獎曰汝不負朕舉朕將用汝爲巡撫讓以母老乞終養賜御書
天麻堂額以榮其母尋母喪以毀卒

崔華字蓮生直隸平山人順治十六年進士康熙六年授浙江開化知縣政務
寬平建塾校藝士爭嚮學縣舊有里總主賦稅橫派滋擾除之又以虛糧爲累
請豁於上官未竟其事十三年耿藩亂作縣南墾戶多閩人豎旗以應城守千
總吳正通賊陷城露刃相逼華從間道出檄召十六都義勇鄭大來夏祚等涕
泣開諭立聚萬人躬冒矢石閱五日城遂復總督李之芳上其事詔嘉之時閩
寇方熾分三路犯浙衢州當中路之衝縣城再陷慘掠尤甚民無叛志華率兵
退保遂安圖恢復時出有所擒斬大兵扼衢州久與賊持十五年春始遣將由
遂安復開化至秋大破賊軍浙境漸清流亡初集積逋尤多華圖上遺黎困苦
狀乞爲請命盡蠲十三年至十六年額賦贖民之流徙者俾得完聚疫癘盛行
廣施藥餌全活無算先後論功十九年擢江南揚州知府值湖河並漲屬縣被

災者衆華加意撫恤二十三年命九卿舉中外清廉之吏廷推七人外吏居其三華爲首焉擢署兩淮鹽運使軍興商困乃權宜變通令先行鹽後納課務與休息商力甦而賦亦無缺先是湖南諸府因兵蠲引三十九萬有奇至是有請補行蠲引者華以兩淮浮課重又帶加斤若補蠲引必致額售者滯銷誤課力言不便事得寢三十一年遷甘肅莊涼道未行卒淮商祠祀之周中鉉字子振浙江山陰人康熙中爲江南崇明縣丞崇明故重鎮兵籍千人欲預取軍食於官不獲穀刃譁噪官吏咸避匿中鉉獨挺身前宣布順逆利害感切聳動衆皆投械散擢華亭知縣民有被誣殺人久繫獄中鉉立出之而坐其實殺人者提標兵庇盜前令莫敢問中鉉捕治置諸法境內又安四十二年秋大霖雨以風海水驟溢漂數縣迺具衣糗棺槨救卹之又爲請賑蠲租活民甚衆雍正四年以催科不及格罷縣民萬數遮言上官聞於朝得復職時左都御史朱軾被命修海塘知中鉉賢悉以事付之塘成丁母憂民復籲留中鉉先已擢松江知府至是予假治喪還視府事五年議濬淞婁諸水以中鉉署太倉知州董其役六

年二月築壩於陳家渡一再潰與千總陸某晝夜冒險指揮倉卒覆其舟既歿而築合事聞贈太僕寺少卿當中鉉令華亭時奉賢猶隸境內後析爲縣中鉉適爲知府至是民懷其澤奉以爲奉賢城隍之神歲時祈報著靈異長洲王芑孫爲廟碑紀其事道光七年巡撫陶澍復濬吳淞江疏請立廟江干

劉棨字弢子山東諸城人康熙二十四年進士三十四年授湖南長沙知縣以廉明稱時訛言裁兵撫標千人環轅門大噪棨爲開陳大義預給三月餉示無裁意衆乃定總督吳璉以循良薦之三十七年擢陝西寧羌知州關中大饑漢南尤甚州無宿儲介萬山中艱於輓運棨請貸隣邑倉粟約民能負一斗至者予三升不十日輓三千石大吏下其法賑他邑咸稱便又奉檄賑洋縣移粟沿漢而下棨先徧歷審勘尅期給發數日而畢謂洋令曰此粟貸之官倘民不能償吾兩人當代任比秋大熟洋縣民相勉還粟不煩催督始寧羌地苦凋瘵棨爲均田額完逋賦補棧道修旅舍安輯招徠期年而廬舍萃集山多櫛葉民未知蠶遣人旋鄉里齎蠶種募善蠶者教之人習其利名所織曰劉公綢士苦無

書爲召賈列肆分購經籍建義塾親爲講解四十一年擢甘肅寧夏中路同知未赴母憂去以代民完賦負累不能行屬弟代售遺產不足弟並以己產易金償負民間之爭輸金爲助卻不受服闋補長沙府同知入覲奉溫旨試文藝於乾清門即日擢山西平陽知府裁汰陋例蠲除煩苛訟牘皆立剖決之四十八年九卿應詔舉廉能吏以知府被舉者惟棨與陳鵬年二人四十九年擢直隸天津道副使迎駕淀津詔許從官恭瞻親洒宸翰棨因奏兄果昔官河間知縣奉清廉愛民之褒乞賜御書清愛堂額上允之歷江西按察使四川布政使五十五年上詢九卿本朝清介大臣數人求可與倫比者九卿舉四人棨與焉駕幸湯泉又以棨治狀語諸從臣會廷推巡撫共薦棨上嘉納之以四川用兵未輕調五十七年卒於官兄果官山西太原府推官有聲改河間知縣康熙八年駕幸河間問民疾苦父老陳果治狀召見褒之卒祀名宦棨子統勳孫墉曾孫鑲之並爲時名臣自有傳

陶元淳字子師江蘇常熟人康熙中舉博學鴻詞以疾不與試二十七年成進

士廷對論西北賦輕而役重東南役均而賦重願減浮額之糧罷無益之費閱者以其言戇置二甲三十三年授廣東昌化知縣到官首定賦役均糧於米均役於糧裁革雜徵自坊里供帳始相率以力耕爲業縣隸瓊州與黎爲界舊設土舍制其出入吏得因緣爲奸元淳立撤去一權量定法度黎人便之城中居人舊不滿百家至此戶口漸蕃元淳時步行閭里問周咨疾苦煦嫗如家人瓊郡處海外軍將多驕橫崖州尤甚元淳嘗署州事守備黃鎮中以非刑殺人游擊余虎縱不問且貪索黎人獻納元淳廉得其狀列欵以上虎私以金賄之不得造蜚語揭之總督石琳下瓊州總兵會訊元淳申牘曰私揭不應發審鎮臣不應侵官必挫執法之氣灰任事之心元淳當棄官以全政體不能蒲伏武臣貽州縣羞也初鞫是獄鎮中令甲士百人佩刀入署元淳據案怒叱曰吾奉命治事守備敢令甲士刼持是藐國法也鎮中氣懾疾揮去卒定讞論罪如律廷人爲語曰雖有余虎不敵陶公一怒而總督卒因元淳倔彊坐不檢驗失實會赦免復欲於計典黜之巡撫蕭永藻初授事曰吾初下車便劾廉吏何以率屬

爲言於總督乃已元淳自奉儉約在官惟日供韭一束喜接諸生講論至夜分不倦屢乞病未果竟以勞卒於官昌化額田四百餘頃半淪於海賦不及二千浮糧居三之一民重困元淳爲浮糧考屢請於上官乞豁除無應者乾隆三年元淳子正靖官御史疏以入告竟獲俞旨免焉

廖冀亨字瀛海福建永定人康熙二十九年舉人四十七年授江蘇吳縣知縣值歲旱留漕賑饑不足自貸金易米以濟士人感其誠相率捐助賑以無乏吳中賦額甲天下縣尤重冀亨減火耗用滾單民皆稱便知收漕弊多拘不法者重治之凡留難勒索踢斛淋尖高颺重節諸害掃除一清太湖中有蘆洲或墾成田或種蓮養魚官吏輒假清丈增糧名以自利冀亨曰湖蕩偶爾成田未可久持今增其賦朝廷所得幾何而民累無盡期一無所問初冀亨莅任時有吳人語之曰吳俗健訟然其人兩粥一飯肢體薄弱凡訟宜少準速決更加二字曰從寬冀亨悚然受之收詞不立定期民隱悉達嘗自謂訟貴聽聽之明乃能速決而無冤抑在吳三年非奸盜巨猾行杖無過二十蓋守此六字箴也有序

生授徒鹽商家自刎死勘得實或有誘其受賄者冀亨無所避卒釋鹽商勿罪
東山巡檢報鄉人弑父屠嫂未遂自盡冀亨方秉二燭閱其詞燭無風齊滅知
有冤尅日渡湖往驗大風舟幾覆從者色變冀亨曰縣官伸冤理枉而來神必
佑之何懼須臾抵岸訊得父故殺狀巡檢得賄誣報俱論如律冀亨既有聲於
吳他縣疑獄往往令推治會有宜興知縣誣揭典史故勘平民爲盜刑夾致死
冀亨奉檄按驗知縣者總督噶禮之私人也或告宜少假借冀亨不爲動檢踝
骨無傷原揭皆誣獄上噶禮屢駁詰再三審卒如冀亨議以是忤總督時巡撫
張伯行以清廉著深契冀亨布政使陳鵬年尤重之而噶禮不懌於伯行尤惡
鵬年四十九年鵬年被劾並及冀亨以虧帑奪職逾年噶禮敗冀亨始復原官
以病不赴選及卒吳人祀之百花書院冀亨歿後家留於吳入籍嘉定曾孫文
錦嘉慶十六年進士由翰林出爲河南衛輝知府有惠政祀名宦文錦子惟勳
道光十三年進士亦由翰林爲貴州鎮遠知府撫苗有法終貴陽府
佟國瓏字信侯奉天人隸漢軍籍康熙三十年由筆帖式授山東文登知縣縣

俗愚悍有勸治宜嚴峻者國瓏曰爲政在誠心愛民興利除害化導之而已嚴峻非民之福也副將某以暱妓蝕餉軍大噪夜半斬關出屯東郊國瓏聞變單騎往諭曰吾與軍民同疾苦有冤當訴我何妄動爲衆猶洶洶國瓏當砲立曰吾不忍見爾曹族誅請先試若砲衆動色曰公廉明軍何敢犯然事已至此奈何國瓏力任保全究其故得實縛妓扶之衆泣拜而散副將尋被劾去歲饑奸民騷動國瓏歷村墟給賑撫諭捕治凶渠民賴以安邑豪宋某以隣婦貸錢不償息殺之吏役得賂皆爲豪掩又以千金賄國瓏國瓏怒覆驗婦有重傷鞫得其情置豪於法邑故瀕海副將林某縛商舶之泊島嶼者數千人指爲寇國瓏訊釋之別捕誅眞盜四十餘人五十年擢山西澤州知州歲祲發常平倉以貸民尅期輸還無爽又減耗羨革陋規省徭役平物價民情大悅國瓏嘗以論事忤太原知府某某嗾人誣揭之坐罷任州民鳴鐘鼓罷市欲詣闕旣而得白留原任時平陽民變巡撫檄國瓏以兵往國瓏曰是速之亂也單騎馳赴民皆額手曰佟公至吾屬無慮矣乃安堵受撫五十九年以疾乞免後以所屬高平令

虧帑被逮責償萬金民感其惠捐金投州庫代償其半云

陸師字麟度浙江歸安人少負文名康熙四十年進士授河南新安知縣修學校集諸生治經童子能應試者免其徭民興於學響馬賊季國玉爲患久捕誅之巡鹽使者下縣取鹽犯四十人師曰律以人鹽並獲始爲犯今勘犯止二人何濫爲父憂歸在途有六七騎挾弓矢驅牛車載婦女三十餘人言歸德饑民某將軍買以歸者也師叱止之令官還婦女於其家白將軍收其騎卒或謂已去官胡忤將軍師曰知縣一日未出境忍以饑民婦女媚將軍耶服闋補江蘇儀徵有盜引良民爲黨師親馳往捕見壞器滿地言有暴客食此不償值因而鬪毀詰其人狀與盜宵事得白春徵勸富戶先輸秋則減其耗令自封投櫃故事驛夫臨時取給鋪戶倉猝滋擾一切禁革但令戶日賦一錢歸驛商賈以安揚州五縣饑大吏令縣各以五千金糴穀備賑具舟車往則虛而歸師察知府意欲縣官借補所虧也力爭於是五縣皆得穀以賑卻鹽商例餽固請乃籍其入以修學宮具祭器樂舞浚泮池植桃李其上修宋文天祥祠又以其餘建倉

廩潔治囹圄質庫書票故有月無日勿論久近皆取一月息師辭其歲餽令視他縣月讓五日舊有豬稅下令蠲除之課最行取擢吏部主事升員外郎掌選有要人求官力持不可督山東礦務條上開採無益罷其役還擢御史巡河讞獄皆稱職康熙六十一年河督陳鵬年疏請以師爲山東袁沂曹道未到官卒祀名宦祠龔鑑字明水浙江錢塘人早與同郡杭世駿齊名雍正初以拔貢就選籍授江蘇甘泉知縣縣新以江都析置故脂膏之地鑑恥爲俗吏一以子惠黎元振興文教爲己任故某侍郎子與有舊入謁有所屬拒之有同城官爲大吏所昵令伺察屬吏者有挾而請又拒之巨室延飲又拒之於是大江南北盛傳甘泉令不近人情鑑益自刻苦無一長物縣境邵伯埭受高寶諸湖之水地卑下鑑謂當於農隙運土築高埂沿隄爲防以徐議溝洫隄上即植桑興蠶事其西境地高澇旬不雨即龜坼宜每一里爲水塘以蓄之如是則高下之田俱無患大吏躡之然不能行邵伯埭下有芒稻河設閘洩水尤要值大水泛溢鑑冒雨至呼閘官洩之閘官以鹽漕爲言不可會總河嵇曾筠視河至鑑直陳厲

聲訶開官曾筠即令啓開又用鑑言定鹽漕船過湖需水不過六尺過即啓開無得藉口蓄水爲民田患每歲晏江都之鰥寡孤獨多入甘泉部中西湖聖因寺僧明慧者恃前在內廷法會恩寵干求徧於江浙一日以書幣關白鑑杖其使而遣之事流傳上聞世宗召明慧還京錮不許出當是時甘泉令聲聞天下在任六年以父憂去官貧至無以葬河南巡撫尹會一故爲揚州守雅與鑑善招之欲使主大梁書院以修脯助葬遂卒於河南鑑湛深經術能摘先儒之誤顧書多未成所成者毛詩疏說闡明李光地之說爲多

清史稿

列傳

循吏二

陳惠榮

芮復傳

蔣林

閻堯熙

王時翔

藍鼎元

葉新

施昭庭

陳慶門

周人龍

童華

黃世發

李渭

謝仲坑

李大本

牛運震

張甄陶

邵大業

周克開

鄭基華

康基淵

言如泗

汪輝祖

茹敦和

朱休度

劉大紳

吳煥彩

紀大奎

陳惠榮字廷彥直隸安州人康熙五十一年進士授湖北枝江知縣修百里洲

隄除轉餉雜派雍正三年遷貴州黔西知州父憂歸服闋署威甯府未幾威甯

改州補大定知府烏蒙土司叛東川鎮雄附之惠榮赴威甯防守城陴頽圯倉

猝聚米桶實土石比次登築墉堞屹然賊焚牛衛鎮去城三十里惠榮日夜備戰賊不敢逼總兵哈元生援至賊敗走尋以母憂去官服闋授江西上饒九南道九江大孤兩關銅幣盡革之乾隆元年經略張廣泗疏薦擢貴州按察使時羣苗交煽軍事方殷古州姑盧朱洪文諸叛案惠榮治鞠詳慎重輕咸稱其情衆心始安及苗疆漸定駐師與屯將吏多以刻急見能二年貴陽大火惠榮謁經略曰天意如此當竭誠修省苗亦人類曷可盡殺廣泗感動戒將吏如惠榮言四年署布政使疏言黔地山多水足可以疏土成田小民難於工本不能變瘠爲腴山荒尤多流民思墾輒見撓阻桑條肥沃亦不知蠶繅之法自非牧民者經營而勸率之利不可得而興也今就鄰省雇募種棉織布飼蠶紡績之人擇地試種設局教習轉相仿效可以有成應責各道因地制宜隨時設教一年必有規模三年漸期成效詔允行乃給工本築壩堰引山泉治水田導以蓄洩之法官署自育蠶於省城大興寺繅絲織作使民知其利六年疏陳課民樹杉得六萬株七年貴筑貴陽開州咸甯餘慶施秉諸州縣報墾田至三萬六千畝

開野蠶山場百餘所比戶機杼相聞惠榮據以入告數被溫旨嘉獎又大修城郭壇廟學舍廣置栖流所收行旅之病者益囚糧冬寒恤老疾嫠孤之無衣者親課諸生勗以爲己之學設義學二十四於苗疆風氣不變十一年遷安徽布政使振鳳穎水災流移獲安十二年卒於官惠榮在貴州興蠶桑爲百世之利時遵義知府陳玉鑿山東歷城人到郡見多檨樹土人取爲薪炭玉鑿曰此青萊樹也吾得以富吾民矣乃購歷城山蠶種兼以蠶師來試育五年而蠶大熟獲繭八百萬自是遵綱之名大著正安州吏目徐階平亦自浙江購繭種仿玉鑿行之正安亦大食其利遵義鄭珍著樗繭譜以傳玉鑿遺法

芮復傳字衣亭順天寶坻人原籍江蘇溧陽康熙四十八年進士授浙江錢塘知縣悉除諸無名錢曰官足給饗殮而已有金三者交通上官署爲姦利立逮杖斃之一時大快五十八年大旱復傳勘實上狀上官欲寢之固爭曰律有捏災匿災並當劾某今日請受捏災罪時同城仁和民千人跣走圍署曰錢塘爲民父母仁和獨不父母我耶上官感動竟以災聞開倉行賑復傳設粥廠二十

有七微行規視治胥吏之侵擾者帑不費而賑溥駐防營卒馳躪民田便宜懲治輒縛而鞭之治績上聞世宗特召引見擢溫州知府故事貢柑歲期至織造封園民以爲累復傳第取足供貢不使擾民府境私鹽充斥設三團集竈戶平其直私販息官鹽不督自行天台山東南有山曰玉環在海中總督李衛欲開田設治檄復傳往勘以徒費無益陳請罷之衛怒檄他吏往意必行時山中田僅二萬畝乃割天台樂清兩縣民田隸玉環經費不足則捐通省官俸又加關津一切雜稅以給之弛山禁漁者往來並稅曰塗稅旣而漁者不入山者度關納稅亦徵其塗稅復傳爭曰是重稅也具牘凡七上衛益怒以爲阻撓玉環墾田事蜚語頗聞劉統勳奉使視海塘過溫州語之曰君與李宮保兩雄不相下不移不屈君之謂乎尋擢溫處道會銅商積弊敗露復傳持法又揭劾知府尹士份不職士份反誣以阻商誤銅大吏故嫉之遂并劾復傳解任總督趙宏恩質訊坐失察關吏舞弊奪職會高宗登極詔仍留浙江辦銅事竣例得復官以親喪歸遂不出家居三十餘年卒年九十有四蔣林字元楚廣西全州人康熙

五十四年進士選庶吉士授檢討直南書房十年不遷大將軍年羹堯欲辟爲幕僚林急告歸尋調戶部郎中出爲福建邵武知府以事解職詔發浙江歷杭州嚴金華三府在杭州值織造隆昇建議改海門尖山海口別開河以固海塘林極言不可曰能使海不潮則役可興否則勞民傷財萬無成理上書督撫俱不省雍正十二年三月夜牒下索杭夫萬五千人合旁郡無慮數萬人期三日集海上林又爭曰田蠶方亟期會迫萬一勿戢奈何必不得已俟蠶功畢隆昇怒督益急以抗旨脅之四月送役往面詰以工不可成狀隆昇益怒留林督役以困之冒雨撫循泥深沒脛役人感其誠咸盡力隆昇復虐使動以捶撻衆屢譁噪微林事幾殆役迄無成隆昇得罪去乾隆初召至京入對即日擢長蘆鹽運使曩時院司歲各費數萬緡林率以儉歲費百緡而已羨餘悉歸公居四年以親老乞養高宗曰世乃有不願久爲長蘆運使者耶久之卒於家

閻堯熙字涑陽河南夏邑人原籍山西太原康熙四十五年進士五十二年授直隸藁城知縣淳沱常以秋溢築隄樹木椿以捍其衝夾岸種柳隄固水不爲

患雍正元年調南宮擢晉州知州州瀕滹沱河河決徙道蕩析民居堯熙爲籌安集民免於患扶携老稚來謝堯熙曰此朝廷恩我何與令望闕拜人給百錢以資裹糧散錢十萬咸感泣曰眞父母也怡賢親王奉使過境聞其名奏循良第一擢山東青州知府未之官改授浙江嘉興俗健訟良懦不得直訟府下縣或不理奸猾益無忌堯熙始至日受狀三百比對簿自請息者二百餘庭折數十各得其情豪民張某稔惡訊實杖殺之民皆稱快屬縣賦重名目糾紛里胥因緣爲姦民完如額官不知民亦不自知官累以缺賦課殿去堯熙巡行清理民始知額歲無逋賦海鹽縣塘工不就總督李衛聽浮言欲開引河洩潮堯熙言滷水入內河田皆傷非特壞廬舍糜帑金已也議遂罷營弁緝私鹽縱其梟持他人抵罪堯熙言其誣總督不聽庭爭再三總督乃自勘釋之愈以賢堯熙累擢湖北按察使四川布政使皆持大體有惠政乾隆七年卒於官堯熙質直好面折人過雖上官不少避然勇於從善在川藩多得成都知府王時翔之助人兩賢之時翔字臬謨江蘇鎮洋人爲諸生績學未遇雍正六年世宗重選守

令命中外官各舉一人同州人沈起元官興化知府以時翔應詔即授福建晉江知縣時福建吏治頽廢遣使按視多更諸守令有司頗尙操切晉江民好訟時翔至曰此吾赤子忍以盜賊視乎一以寬和爲治坐堂皇响响作家人語曲直旣判令兩造釋忿相對揖由是訟者日衰觀風整俗使劉師恕按泉州委時翔鞫疑獄二十餘事語人曰晉江長者決獄又何精敏也尋調政和又調甌甯擢漳州府同知駐南勝南勝民族居峒中多械鬪有賴唱者糾衆奪犯匿險自固時翔親入山諭之曰汝諸賴萬人奈何庇一人而以死殉耶爲我縛唱來即無事唱不得已自縛出治如律瀨子坑民葉揚煽亂時翔謂緩之可一紙定或張其事大吏檄入山勦之事平意不自得乞病歸乾隆元年以薦起山西蒲州府同知擢成都知府以廉率屬善審機要錢價騰布政使榜平其直市大譁時翔方在假召成都華陽二令曰市直當順民情抑之錢閉不出奈何言於布政撤其榜錢價尋平議徙涼州兵於成都拓駐防城當奪民居二千家時翔檢故牘請曰城故容兵三千見兵一千五百尙虛其半第出見所侵地足矣奚拓爲

清史稿 四
已而涼州兵亦不果徙成都當康熙時人希穀賤旗兵利得銀至雍正以後生聚多穀貴又願得穀或徇其意令民受銀購穀給兵未幾漢兵亦欲仿行時翔曰旗兵例不出城語言與土人殊故代購漢兵皆土著奚代爲二事亦賴布政力主其議得止至七年江南湖廣災巡撫奏運蜀米四十萬石濟之湖廣急米來領運江南則否巡撫乃檄下縣餽運舳艫蔽江商賈不通成都薪炭俱絕時翔謂江南運可緩徒病蜀請獨運楚而聽商人自運江南時堯熙既歿竟無用其言者時翔在成都屢雪疑獄時稱神明九年卒

藍鼎元字玉霖福建漳浦人少孤力學通達治體嘗泛海攷求閩浙形勢巡撫張伯行器之曰藍生經世之良材吾道之羽翼也康熙六十年臺灣朱一貴倡亂鼎元從兄南澳鎮總兵廷珍率師進討多出贊畫七日臺灣平復從廷珍招降人殄遺孽撫流民綏番社歲餘始返著論言治臺之策大意謂土地有日闢無日蹙經營疆理則爲戶口貢賦之區廢置空虛則爲盜賊倡亂之所山高地肥最利墾闢利之所在人所必趨不歸之民則歸之番與賊即使內亂不生寇

自外來將有日本荷蘭之患不可不早爲措置時議者謂臺灣鎮當移澎湖鼎元力言不可大吏採其說見諸施行鼎元復爲臺灣道條十九事曰信賞罰懲訟師除草竊治客民禁惡俗儆吏胥革規例崇節儉正婚嫁興學校修武備嚴守禦教樹畜寬租賦行墾田復官莊恤澎民撫土番招生番後之治臺者多以爲法雍正元年以選拔入京師分修一統志六年大學士朱軾薦之引見奏陳時務六事世宗善之尋授廣東普甯知縣在官有惠政聽斷如神集邑士秀異者講明正學風俗一變調權潮陽縣事歲荐飢多逋賦減耗糧除苛累民爭趨納妖女林妙貴惑衆寘之法籍其居建棉陽書院以忤監司罷職總督鄂彌達疏白其誣徵詣闕逾年命署廣州知府抵官一月卒鼎元尤善治盜及訟師多置耳目劾捕不稍貸而斷獄多所平反論者以爲嚴而不殘志在經世而不竟其用著鹿洲集東征集平臺紀略棉陽學準鹿洲公案傳於世

葉新字惟一浙江金華人康熙五十一年順天舉人從蠡縣李塉受業立日譜自檢尤嚴義利之辨雍正五年以知縣揀發四川授仁壽縣有與隣縣爭地界

者當會勘鄉保因閩人以賄請新怒悉下之獄勘畢各按其罪由是吏民斂手奉法署嘉定州故有沒水田多逋賦新視曠土可耕者召民墾闢以新科抵賦額舊逋悉免時仁壽採木部匠倚官爲暴民勿堪糾衆相抗縣以變告檄新往治之抵匠頭及首糾衆者於法餘釋不問遷邛州知州再遷夔州府同知署龍安及成都知府又署瀘州知州訟者至立剖決滯獄一空治瀘兩載俗一變焉新自授夔州同知閱五載始一蒞任尋又署保寧順慶兩府擢雅州知府母憂歸乾隆十年服闋補江西建昌修旴江書院招引文士與講論學術復南城黃孝子祠以勵民俗十三年南豐令報縣民饒令德謀反令德好拳勇令以風聞遣役往偵誤探其讎謂謀反有據遂逮令德適他往乃逮其弟繫獄令德歸白詣縣受刑誣服雜引親故及隣境知識爲同謀追捕蔓及旁郡新得報集諸囚親鞠株連者已七十餘人言人人殊新詰縣役捕令德弟狀役言初至其家獲一篋疑有金寶匿之及發視無所有棄之野令聞意篋有反迹訊以刑妄稱發篋得簿劄納賄毀之矣令謂實然遂逼令德誣服新於是盡釋七十餘人縲綬

命隨往南昌戒之曰有一逋者吾代汝死矣及至七十餘人則皆在謁巡撫具道所以巡撫愕不信集才能之吏會勘益雜逮諸所牽引卒無據而巡撫已於得報時遽上奏朝命兩江總督委官就讞新爲一一剖解得白所全活二百餘人十七年調贛州有贛縣搶奪拒捕之獄值改例新舊輕重懸殊新謂事在例前當依舊比爭之不得復以甯都民獄事與同官持異同不得直謝事閉門候代上官慰諭不從遂以任性被劾免歸欣然曰今而後可無疚於心矣家居十餘年卒施昭庭字筠瞻江蘇吳縣人康熙五十四年進士授江西萬載知縣地僻多山客民自閩粵來居之累年積三萬餘人號曰棚民溫尚貴者臺灣逸盜也亦處山中雍正元年福建移捕盜黨急尚貴謀爲變始昭庭之至也以棚民爲慮厚禮縣人易廉野使偵之廉野積粟貸棚民不取息或免償得棚民心其才者嚴林生羅老滿從廉野游盡得山中要領尚貴將舉事廉野以聞昭庭林生老滿率勇敢三百人待之尚貴有衆二千肆掠昭庭曰賊易破也然慮其擾傍縣撫賊諜使誑尚貴趨萬載乃張疑兵於山徑賊不敢入由官道來預設伏

叢棘中伺賊過突出擊殺賊數中伏疑駭逆擊之一戰獲尙貴尙貴起二日而敗又二日而撫標兵至初柵民與市人積嫌事起道路洶洶指目柵民昭庭以免死帖與諸降者取柵民不從賊者結狀兵至搜山不戮一人巡撫初到官張其事入奏既見縣申狀不合欲改之昭庭不可又謂柵民匿盜從亂今雖赦之必驅歸本籍昭庭曰柵民種植自給非刀手老瓜賊之比歷年多生齒衆間與居民爭訐細故不必深懲今亂由臺灣逸盜而平盜悉資柵民力請覈戶口編保甲泯其主客之形寬其衣食之路長治久安於計便總督查弼納許之巡撫尋亦悟如昭庭策柵民乃安事聞世宗諭九卿曰知縣以數年心力辦賊巡撫到官幾日豈得有其功耶獨下總督疏議叙以主事知州用尋引疾歸卒於家陳慶門字容駟陝西盩厔人雍正元年進士從鄂王心敬講學養親不仕母王趣之乃謁選七年授安徽廬江知縣修建文廟規制悉備大濬城濠置義田二百畝有奇贍養癯獨立社倉四所積穀以貸平民縣民舊習止知平疇種稻高阜皆爲棄壤因市牛具仿北方種植法躬督墾闢遂享其利尋署無爲州事州

瀕江上下二百里率當水衝前人築壩四常沒於水慶門於鮑魚橋鮑魚口二處樹椿編竹實土爲坦坡又取亂石填擲水中水停沙淤久而成洲民免墊溺之患又署六安州舊有水塘議者欲墾塘以爲田將絕灌溉之利慶門力言於上官事乃寢十一年擢亳州知州俗悍好羣鬪倚蠹役表裏爲奸慶門廉得其魁黨先後杖遣數百人又好訟仿古鄉約法使之宣導排解勤於聽斷日決數十事不數月澆風一變州瀕湖地窪下用秦中收淀之犂法督民挑濬地下者漸高水歸其壑農田賴焉母憂歸乾隆元年服闋以大臣薦補四川達州知州境環萬山歲常苦旱教民種旱稻始無艱食之憂隣郡巴州桑柘素饒乃買桑徧植教以分繭繅絲之法獲利與巴州等時川東多流民官廩不給遂釐剔腴田之被隱占者爲義產以贍之全活甚衆建宣漢書院聘名流教授文風漸振未幾乞病歸著仕學一貫錄世以儒吏稱之

周人龍字雲上直隸天津人康熙四十八年進士授山西屯留知縣興學賑荒有聲調清源境內洞渦嶽峪諸河入汾常有水患濬渠築堰民賴之歷忻州直

隸州知州蒲州知府蒲郡瀕黃河河水遷徙無常山陝兩省民隔河爭地訟數十年不結人龍請於大吏曰臨河灘地當以河爲界河東遷則山西無地之糧歸陝西河西遷則陝西無地之糧歸山西糧隨地起不缺正賦因地納糧無累民生山陝沿河二千餘里凡兩省湮沒之地令地方官照糧查地按地過糧除鹵城者照例題請免徵其餘水退之地招令沿河民認糧承種庶事無偏枯爭訟可息大吏從其議至今使之雍正初有言丁糧歸地便於無力之丁不便於有田之家人龍駁之略曰有田者尙以輸納爲艱豈無田者反易君子平其政焉得人人而悅之今不悅者不過紳衿富戶而大悅者乃在熒熒無告之小民若因其控告而不行則豪強得志而窮民終於無告此議在當日未行則已耳今行之數年勢難中止窮民狃於數年樂利必不安於一旦變更且富民少而窮民多不當以彼易此議上事乃定以憂去官服闋補湖北安陸數月擢江西督糧道未行江水決鍾祥三官廟隄及天門沙溝垸招集鄰縣民諭以利害同築禦踴躍荷畚鍤至者數萬人親冒風雨率以施工或勸其已遷官何自苦人

龍曰助夫由我招至我去即散矣伏汛一至民何以堪閱兩月工成安陸人尸祝之江西漕糧徵運素多弊嚴立規條宿蠹一清乾隆十年乞病歸卒

童華字心樸浙江山陰人年未冠爲諸生長習名法家言出佐郡邑治雍正初入貲爲知縣時方修律例大學士朱軾薦其才世宗召見命察賑直隸樂亭盧龍兩縣報饑口不實華倍增其數怡賢親王與朱軾治營田水利至永平問灤河形勢華對甚晰王器之尋授平山知縣邑災不待報遽出倉粟七千石貸民擢眞定知府權按察使以前在平山發粟事部議免官特詔原之怡賢親王奏以華理京南局水利華度眞定城外得泉十八疏爲渠溉田六百畝先後營田三百餘頃滏陽河發源磁州州民欲獨擅其利自春徂秋閉閘蓄水下游永年曲周滴涓不得時改州歸直隸以便控制華建議仿唐李泌明湯紹恩西湖三江兩閘遺規計板放水數縣爭水之端永息華又以北人不食稻請發錢買水田穀運通倉省漕費民得市糴黍以爲食從之調江蘇蘇州會清查康熙五十一年以來江蘇負課千二百餘萬巡撫督責急速捕追比無虛日華固請寬之

巡撫怒曰汝敢逆旨耶對曰華非逆旨乃遵旨也上知有積欠不命嚴追而命清查正欲晰其來厯查其委曲或在官或在役或在民或應徵或應免了然分曉奏請上裁乃稱詔書意今奉行者不顧名思義徒以十五年積欠立求完納是暴征非清查也今請寬三月限當部居別白分牒以報巡撫從其請乃盡釋獄繫千餘人次第造冊請奏時朝廷亦聞江南清查不善下詔切責如華言浙江總督李衛嘗捕人於蘇華以無牒不與衛怒蜚語上聞世宗召見責以沽名干譽對曰臣竭力爲國近沽名實心爲民近干譽上意解命往陝西以知府用署肅州佐經略鄂爾泰屯田事鑿通九家窰五山引水穿渠溉田萬頃以忤巡撫被劾罷官乾隆元年起福州知府調漳州頗好長生術招集方士習丹家言復劾罷歸數年卒華剛而忤時屢起屢蹶在蘇州民德之尤深以比明知府況鍾當世宗治畿輔營田時所用者多一時賢守令有黃世發名與華相媿云世發字成憲貴州印江人康熙三十五年舉人授直隸肅甯知縣舊例錢糧加一二作耗銀世發亦收之而不自用雜派畝銀三四錢悉除之縣有役事若修學

校繕城垣及上官別有攤派即以耗銀應河間府檄修府城親齎餼糧出錢雇役不以擾社甲視民如家人教以生計坑灘荒地令穿井耕種緣城植桑柳樹萬株凡水車蠶箔糞灌紡績悉爲經畫復闢護城廢地穿池種稻以導之建社學教以孝親敬長贖官田九十餘畝以其租爲學者膏火旬三日集諸生講學會文士有自隣縣來學者雍正三年水災大吏遣官履勘世發不能得其意被劾罷士民呼籲挽留特詔復官加四品銜已晉授按察使兼直隸營田觀察使巡行勸民農桑察水利可興者所至剴切宣諭民多興起修隄墾田變汗下爲沃壤最後開易州水峪田經營年餘以勞卒

李渭字棗涯直隸高邑人父兆齡康熙中官福建閩清知縣以廉能稱渭康熙六十年進士授內閣中書遷刑部主事雍正二年出爲湖南岳州知府詔許密摺奏事件大吏左遷武昌府同知未之任丁母憂服闋授四川嘉定知府復以爭冤獄忤上官渭曰吾官可棄殺人媚人不爲也奉檄賑重慶水災多所全活父憂歸後補河南彰德萬金渠源出善應山環府城入洹河灌田千數百頃山

水暴發易淤渭履勘濬治增開支河建閘啓閉定各村分日用水歲以有秋漳河當孔道舊設草橋於臨漳道回遠移於豐樂鎮行旅便之雪武安民班某誣殺族兄獄林縣富室毆人死賂屍屬以病死報渭驗屍骸骨盡碎治如律舉卓異乾隆九年擢山東鹽運使時議增鹽引渭以增引則商不能賠必增鹽價商民且兩病持不可十二年山東大水大吏檄渭勘災至益都博興樂安諸縣餓莩載途而有司先以未成災報已入告難之乃請以借作賑異日免追民乃蘇十三年就遷按察使折獄平嘗曰古人言求其生而不得今俗吏移易獄詞何求生不得之有然如死者何此婦寺之仁非持法之正尋遷安徽布政使禁革徵糧長單差催法以杜詭寄調山東墾荒令客民帶完舊欠免鄰保代賠逃戶之累民便之爲政持大體不吝出納不輕揭一官馭吏嚴而不念舊過十九年卒於官子經芳乾隆中官至湖南施南知府亦廉謹守其家風

謝仲玩字孔六廣東陽春人雍正元年舉人登明通榜初官長甯教諭乾隆初擢授湖南常甯知縣峻却餽遺履鄉自裹行糧嚼生菜菹供饌月兩課士以節

行相勸勉調平江再調衡陽前令李澎徵漕米浮收斛面糧儲道謝濟世發其
奸時巡撫許容方以浮收誣劾濟世總督孫嘉淦亦徇巡撫意故濟世與澎並
免言官論奏朝命侍郎阿里袞往按署糧道倉德又因布政使函屬改換衡陽
浮收詳文據以上揭詔責切究事急澎則盡出賄贈簿以脅上官阿里袞重興
大獄欲出澎浮收罪與濟世俱復官仲坑乃重治澎丁役以決罰過當被劾罷
官逾年特起爲衡山知縣以讞巴陵獄巡撫與按察使互奏奉旨引見擢荊州
府通判又以歸州縱盜寃良之獄自巡撫按察以下皆被重譴仲坑承審時堅
不會印特旨召對擢常德府同知歷署襄陽寶慶宜昌武昌永順岳州永州七
府知府護永郴桂道正躬率屬屏絕請託暇輒延耆士論學不倦仲坑官湖南
先後三十年長於折獄大吏倚重歷奉檄鞫獄二百餘多所平反以直懸名乾
隆三十七年在永州議改淮引食粵鹽格於例不行遂以目疾請告解組日貧
如故卒於家李大本字立齋山東安邱人雍正十三年舉人乾隆九年銓授湖
北棗陽知縣改湖南益陽居官自奉儉約勤於吏事益陽人不知蠶大本教之

樹桑後賴其利調長沙遷寶慶府理彜同知所隸通通水峒有苗僧行賈臨桂知縣田志隆見之意爲賊黨吳方曙者從馬朝桂謀叛時方繪圖懸購者也僧畏刑誣服又訊朝桂所在妄言在峒中廣西巡撫定長立上奏率兵出命大本從行大本曰僧言眞僞不可知大兵猝至苗必駭且生變請潛訪之旣而白僧言實妄巡撫疑未釋復欲以兵往大本力諫乃止後廷訊苗僧果誣如大本言橫嶺峒苗乏食顛官求粟大本多方賑之復爲苗民籌生計請於上官曰橫嶺峒自逆渠授首安插餘苗因惡其人故薄其產每口授田才三十疇至四十疇每疇上田獲米六升中田五升下田四升得米無多又峒田稍腴者盡與堡卒極惡者方畀苗民歲入不足男則斫柴易米女則劓蕨爲粉給口食年來生齒日繁材木竭米價益昂飢餓愁嘆深可憐憫恐不可坐視而不爲之所見有入官苗田一千三百四十八畝舊募漢民佃種出租供饑奸良不一屢經陶汰請視苗民家貧丁衆者書諸簿有漢佃應除者即書簿之苗丁次第受種出租如故則苗民得食而饑亦無虧乃補救之一端議上不許後巡撫陳宏謀見之曰

此識時務之言也將陳其事會他遷未果二十一年題請升授知府因病足歸卒於家

牛運震字階平山東滋陽人雍正十一年進士乾隆元年召試博學鴻詞不遇尋授甘肅秦安知縣開九渠溉田萬畝縣北玉鍾峽山崩塞河水溢爲災運震率丁夫開濬凡四日夜水退緣山步行以錢米給災戶縣聚曰西固去治二百餘里輸糧苦運艱多積逋運震許以銀代納民便之先是巡檢某誣馬得才兄弟五人爲盜前令弗察得才自刎死其兄馬都上控令又誘而斃之獄其三人者將解府運震鞫得其情昭雪之又清水縣某令冤武生杜其陶父子謀殺罪上官檄運震覆治驗死者得自刎狀以移屍罪其陶而釋其子他訟獄多所平反官秦安八年惠農通商暇則行視郊野鑄農具教民耕耨稱貸販褐戶不求其息設隴川書院日與諸生講習民始向學兼攝徽縣又攝兩當縣葺舍於三縣之中曰大門鎮以聽訟徽縣多虎募壯士殺虎二十六道始通調平番值縣境五道峴告饑捐粟二百石以賑民感之人輸一錢製衣銘德運震受衣返幣

固原兵變四掠督撫皆至涼州檄召運震問方略運震請勿以兵往但屯城外爲聲援令城內擄出亂者游擊某執三百餘人衆汹懼運震請釋無辜入城慰諭斬三人監候四人餘予杖徒有差反側遂安有忌者撫前受萬民衣事劾免官貧不能歸留主皋蘭書院教學得士心及歸有走千里送至灞橋者運震居官不假手幕下事輒自治所至嚴行保甲鬥爭訟獄日即於少遇人干訟必嚴懲治盜尤嚴曰邊鄙風俗疵悍不如此則法不立令不行民不可得而治且與其輕刑十人不如重處一人而九人畏是懲一而恕九也罷官歸後閉門治經搜考金石所著經義史論文集及金石圖皆行於世嘗主晉陽河東兩書院所造多名雋士世稱空山先生張甄陶字希周福建福清人舉鴻博補試未合格罷大學士朱軾侍郎方苞薦修三禮辭而請受業於苞乾隆十年成進士時方許極言直諫甄陶對策因極陳時務選庶吉士授編修尋改授廣東鶴山知縣厯香山新會高要揭陽皆劇邑所至有聲疆田疇修隄圩弛蛋戶蠹蛄之禁增建書院社倉平反冤獄詰捕盜賊爲政務無拂逆於民以憂去官服除起授雲

南昆明弗獲於上官坐事免主講五華書院尹壯圖錢灃皆其弟子復移掌貴州貴山書院課士有法總督劉藻疏薦詔加國子監司業銜晚以病歸閩主鼇峯書院以經義教閩士於是咸通漢唐注疏之學在滇時著經解百餘卷方甄陶之補外人咸惜之大學士陳世倌贈以明呂坤呻吟語甄陶讀其實政錄而慕之在粵作學實政錄見其書者咸曰循吏之言也

邵大業字在中順天大興人舊籍浙江餘姚雍正十一年進士乾隆元年授湖北黃陂知縣初到官投訟牒者至至不移晷決遣立盡吏人一見問姓名後無不識衆莫敢弄以事有兄弟爭產訟皆頌白貌相類令以鏡鏡面問曰類乎曰類則進與爲家人語曰吾新喪弟獨不得如爾兩人白首相保也二人感動罷去蛟水壞城當壞處立誓以殉水驟止振溺舖飢完隄岸民得免患總督以其名上聞會父憂去服闋授河南禹州知州調睢州頻澇請糶請賑民以免患濬惠濟河以俸錢更直擢江南蘇州知府松江盜獄久不決株連痠斃者衆奉檄鞠治見羣犯皆斷脛折踝蹙然曰爾等亦人子迫飢寒至此尤茹刑顛倒首從

誣連非罪人何益於爾有盜幡然曰官以人類待我我不忍欺獄辭立具兼署
蘇松太道尋攝布政使事大吏交章薦十六年高宗南巡御舟左右挽行名嘏
鬚絳大業語從臣除道增絳必病民非所以宣上德意遂改單絳會積雨治吳
江帳殿未就總督劾大業觀望及乘輿至則供備已具然大業卒因左遷尋授
河南開封知府屬縣封邱民被控侵占田畝及勘丈非侵占而畝浮於額大業
考志乘河南賦則自明萬厯改併中地十畝作上地七畝下地十畝作上地三
畝上官以昔爲下則今則膏腴議加賦大業曰此河衝淤積百姓以墳墓田廬
所易之微利也今日爲退灘淤地異日即可爲沙壓水衝冬春播種夏秋之收
穫不可知上年河決屋宇未盡葺流亡未盡復遽增歲額何以堪旋從部議試
種三年次年果沒入水乃止未幾以河溢降江南六安州知州又以盜案鐫級
引見再還江南署江甯府二十八年授徐州知府府城三面瀕黃河西西北隅尤
當衝雖有重隄恃韓家山埽爲固大業按視得蘇公舊隄起城西雲龍山迄城
北月隄長三里湮爲民居復其舊越歲韓家山埽幾潰民恃此隄以無恐復濬

荆山橋河於水利宣洩規畫盡善治徐七年間有水患不病民三十四年坐妖
匪割辯事罷職謫戍軍臺數年卒大業所至以勸學爲務因黃陂二程子祠建
義學葺睢州洛學書院集諸生親爲之師焉

周克開字乾三湖南長沙人乾隆十二年舉人十九年以明通榜授甘肅隴西
知縣調寧朔縣屬寧夏府並河有三渠曰漢來唐延大清皆引河入渠灌田唐
延渠所經地多沙易漫克開治之使深狹又頗改其水道渠行得安渠有石竇
洩水於河以備旱澇民謂之暗洞時暗洞崩塞渠水不行上官欲填暗洞而竭
唐延入漢來以便寧夏縣之引河寧夏利而寧朔必病克開恐夏秋水盛無所
宣洩時新水將至不可待克開請五日爲期取故渠及廢閘之石晝夜督工五
日而暗洞復兩縣皆利大清渠長三十餘里鑿自康熙間久而石門首尾壞民
失其利克開亦修之皆費省而工速再以卓異薦擢固原知州父憂去服闋補
洮州尋擢貴州都勻知府從總督吳達善侍郎錢維城治貴州逆苗獄用法有
失當者力爭無少遜調貴陽亦以強直忤巡撫宮兆麟因公累解職引見復授

山西蒲州知府調太原清釐積獄修復風峪口堤堰障山潦導之入汾民德之擢江西吉南贛甯道署布政使以王錫侯書案被議高宗知其賢發江南以同知用會南巡克開署江甯府迎駕授江西九江知府尋擢浙江糧儲道時巡撫王亶望貪黷屬吏多重徵以奉上官克開至誓不取一錢請於巡撫約與之同心亶望姑應之心厭克開乃奏克開才優請移治海塘於是調杭嘉湖道會改建海岸石塘總督欲徙柴塘近數百丈以避潮克開曰海與河異讓之則潮必益侵無益也乃止年餘以督工勞瘁卒克開在甯朔治水績最著生平治獄多平反禮儒士嘗以私錢興書院沒無餘資天下稱清吏當時守令以興水利著者又有鄭基康基淵言如泗後有周際華基字築平廣東香山人以諸生入貲爲知縣乾隆間銓授安徽鳳臺縣東鄉有通川三日黑濠曰溼泥曰畚溝匯穎上蒙城諸縣水以達淮歲久盡湮秋潦輒成巨浸侍郎裘日修奉使治滙穎諸水獨不及鳳臺基具牘陳利害及工事甚悉日修允其請基察土宜穿故渠三河交暢醞上游諸水以通匯流不逾時工成魯松灣地遠淮而卑頻患潦捐俸

倡築隄障遂成膏腴調定遠舉卓異擢壽州知州安豐塘古芍陂也塘圯基審
覈舊制繕復之爲水門三十六爲閘六爲橋一其旁則爲場爲堰爲圩啟閉以
時汙萊盡闢嘗循行阡陌見沙地磽确多不治教民種薯蕷佐菽麥俾無曠土
壽州不知蠶織而地多椿樗可飼蠶購蠶種教民飼之農桑並興其後遇旱獨
鳳臺壽州秋成稔於他縣以水利修也遷泗州直隸州知州振水災飢而不害
擢江蘇淮安知府淮安爲衆水所聚於城東濬澗市河於北開漁濱山字河於
西開護城河壅滯悉通民便之基博覽前史於河渠水利圖經丹鉛殆徧施行
輒有成效乾隆四十一年擢江南守巡道命甫下而卒基淵字靜溪山西興縣
人乾隆十七年進士歸班銓授河南嵩縣知縣舊傍伊水有渠十一久湮絕基
淵按行舊址勸民修復山澗諸流可引溉者皆爲開渠渠身高下不一者分段
設閘以蓄洩之田高渠下者則教爲水車引溉凡開新舊渠十八灌田六萬二
千餘畝巡撫上其事優詔議叙尋以憂去服闋授甘肅鎮原調臬蘭擢肅州直
隸州知州洪水渠岸竣易崩基淵度勢於南石岡引鑿渠口以避沖陷之害野

豬溝有荒田無水久廢基淵詢訪耆舊加寬柳樹開龍口別開子渠界荒田爲
七區招民佃種區取租十二石給各社學名曰新文渠州東南九家窩鑿山後
渠開屯田舊駐州判主之久之田益薄瘠民租入不足支官役基淵請汰州判
改屯升科爲籌歲修費民於是有恆產基淵治官事如家事博求利病在嵩縣
植桑教蠶出絲甲於他邑以無業之地建社學三十二所在肅州開郊州廢灘
種楊十餘萬株徧諭鄉堡種樹薪樵取給建社學二十一所又於金佛清水兩
鄉建倉以免徵糧借國民房之累革番民採買需索皆有實惠四十四年擢江
西廣信知府卒於官如泗字素園江蘇昭文人言子七十五世孫乾隆三年高
宗臨雍如泗以賢裔陪祀賜恩貢生充正黃旗官學教習十四年銓授山西垣
曲知縣城濱黃河修石隄以捍水亳河故有數渠復於上游濬之分以溉田民
稱言公渠調聞喜涑水湍急舊渠多圯別濬新渠食其利者五村舉卓異擢保
德直隸州知州新疆軍興徵調過境值歉歲如泗經畫曲當民無所累陝西巡
撫明德聞其能而薦之乞養歸父喪除補解州白沙河在城南地如建瓴南決

則害鹽池北決則壞城如泗請於大吏用鹽帑修築兩岸石堰長五里又姚暹渠本以護鹽池民田不能灌溉故事商民分修商盡諉之於民力爭乃仍舊貫二十九年擢湖北襄陽知府如泗愛士恤民而治盜嚴在解州民間夜不閉戶襄陽素爲盜藪聞其至盜皆遠遁三十四年因失察屬員罷職尋以皇太后萬壽祝嘏復原官遂不出嘉慶十一年卒於家年九十一光緒中祀名宦際華字石藩貴州貴筑人嘉慶六年進士內閣中書親老乞改教職歷遵義都勻兩府教授以薦擢知縣道光六年授河南輝縣百泉出縣北蘇門山衛河之源也其西諸山水經縣南入衛曰峪河其北諸澗水歷縣東入新河曰東石河新河者自縣北鑿渠引衛河至縣南復入衛又稱玉帶河皆貫疏洩利灌溉時並淤塞遇水輒苦漂溺際華履視溝渠出俸錢率民醵資濬峪河修紅石堰疏新河鑿東石河六十餘丈堅築其岸諸渠綺交脈注潦患以息課民種桑四萬株教之育蠶他樹亦十五萬株於是邑有絲絮材木之利蘇門故多名賢祠宇咸新之修明祀事以厲風教焉陝州直隸州知州自灑池入陝道硤石五十餘里險

惡爲行旅所苦際華別開平道往來者便之迴避改授江蘇興化縣當裏下河
之下游水患尤急際華議開攔江壩以洩湖河之水鹽官及商皆力爭以爲壩
開則水南下溜急於鹽舟牽挽不便際華曰彼所爭者十四里牽挽之勞以較
揚州東七縣田廬場竈之漂溺蠲免賑恤之煩費輕重何如總督林則徐踵其
議調江都兼署泰州毀淫祠百餘區改爲義學則徐疏薦之尋告歸卒於家先
是輝縣及興化民皆不習織際華輒自出資置織器教之轉相授於是二縣有
衣被販貿之利至今賴之輝縣請祀名宦祠

汪輝祖字龍莊浙江蕭山人少孤繼母王生母徐教之成立習法家言佐州縣
幕持正不阿爲時所稱乾隆二十一年成進士授湖南甯遠知縣縣雜徭俗積
逋而多訟前令被訐去黠桀益肆挾持又流丐多強橫輝祖下車即捕其尤驅
餘黨出境民納賦不及期手書諭之曰官民一體聽訟責在官完賦責在民官
不勤職咎有難辭民不奉公法所不恕今約每旬以七日聽訟二日較賦一日
手辦詳稟較賦之日亦兼聽訟若民皆遵期完課則少費較賦之精力即多聽

訟之功夫民感其誠不逾月而賦額足治事廉平尤善色聽援據比附律窮者
通以經術證以古事據漢書趙廣漢傳鉤距法斷縣民匡學義獄據唐書劉蕡
傳斷李蕭兩氏爭先隴獄判決皆曲當而心每欲然遇匪人當予杖輒呼之前
曰律不可逭然若父母膚體奈何行不肖虧辱之再三語罪人泣亦泣或對簿
者反代請得免卒改行爲善良每決獄縱民觀聽又延紳耆問民疾苦四鄉廣
狹肥瘠人情良莠皆籍記之甯遠例食淮鹽直數倍於粵鹽民食粵私大吏遣
營弁偵捕輝祖白上官以鹽愈禁則值愈增私不可縱而食淡可虞請改淮引
爲粵引未及報輝祖即張示鹽不及十斤者聽偵弁謂其縱私輝祖揭辨總督
畢沅嘉之立弛零鹽禁時偉其議兩署道州又兼署新田縣皆有惠政以足疾
請告時大吏已疏調輝祖善化又檄訊隣邑獄因足疾久不赴疑其規避奪職
歸里閉戶讀書不問外事值紹興西江塘圯巡撫吉慶強輝祖任其事帑節工
堅時稱之舉孝廉方正固辭免輝祖少尙氣節及爲令持論挺特不屈而從善
如轉圜所著學治臆說佐治藥言皆閱歷有得之言爲言治者所宗初通籍在

京師待銓主同郡茹敦和論治最契同時朱休度並以慈惠稱敦和字三樵浙江會稽人初嗣婦翁李爲子占籍廣東乾隆十九年成進士歸本宗授直隸南樂知縣慎於折獄以片紙召兩造立剖曲直當笞者薄責之民輒感悔自新擇清白謹愿者充社長里正令密陳利弊以次行之縣當豬龍河之衝察河源委於開州清豐之間審地形高下因勢利導水不爲患地多茅沙鹽鹹教以土化之法廣植雜樹鄉民以麥稽編笠爲生敦和勸種桑調大名漳水患劇旁有渠河敦和謀開渠以殺其勢適內遷大理寺評事不及上請乃手書揭城門勸民刻期集河干親爲指示民具畚鍤來者以萬計經旬而渠成後利賴之尋復出爲湖北德安府同知署宜昌知府緣事降秩卒祀直隸名宦祠子棻以一甲一名進士官至兵部尙書休度字介斐浙江秀水人乾隆十八年舉人官嶧縣訓導以薦授山西廣靈知縣值大荒疫流亡過半休度安撫招徠糧籍舊未清履勘勸耕一年而荒者墾三年而無曠土糧清賦辦獲優叙尤善決獄劉杷子妻張以夫出飢欲死易姓改嫁郭添保疑郭爲略賣詰朝手刃所生子女二而自

到休度詣驗婦猶未絕曰郭作聲曰販販察其無他情讞定杷子乃歸衆曰汝欲知婦所由死問朱爺休度語之狀並及其家某事某事杷子泣曰我歸愆期至此勿怨他人矣稽首去薛石頭偕妹觀劇其友目送之薛怒刃傷其左乳死自承曰早欲殺之死無恨越日復詰之曰一刃何即死也薛曰刃時不料即死曰何不再刃薛曰見其血出不止心惕息何忍再刃遂以誤殺論減戍休度嘗曰南方獄多法輕情重北方獄多法重情輕稍忽之失其情矣待人以誠人亦不忍欺周知民情訴曲直者數語處分民皆悅服數年囹圄一空舉卓異嘉慶元年引疾歸縣人懇留不得乞其壺山垂釣小像勒諸石歿後祀名宦休度博聞通識尤深於詩以其鄉朱彝尊錢載爲法任校官時採訪遺書得四千五百餘種撰總目上諸四庫大學士王杰爲學政任其一人以集事時盛稱焉

劉大紳字寄庵雲南甯州人乾隆三十七年進士四十八年授山東新城知縣連三歲旱大紳力拯之調曹縣代者至民數千遮道乞留大吏爲留大紳三月及至曹縣旱災更重於新城大紳方務與休息河督檄修趙王河決隄集夫萬

餘人以工代賑兩月竣事無疾病逃亡者既又檄辦河工稽料三百萬大紳以時方收斂請緩之大吏督責益急將按以罪請限十日民間爭先輸納未即期而數足一日巡行鄉間有於馬後議穀賤銀貴開徵期迫者大紳顧語之曰俟穀得價再輸未遲也語聞於大吏怒其擅自緩徵遣能吏代之民慮失大紳爭輸賦代者至已畢完大吏因責徵累年逋久倘不足終以代者受事民益恐晝夜輸將不數日得三萬餘兩初大紳以忤上官意自劾求去民環署泣留相率走訴大吏適大吏有事泰山路見而諭止之不得去至是密自申請民知之已無及乃得引疾歸五十八年病起仍發山東補文登值新城修城大吏徇士民請檄大紳督工逾年始竣尋以曹縣舊獄被議罷職遣戍新城曹縣民爲捐金請贖得免歸嘉慶五年有密薦者詔以大紳操守廉潔兼有才能辦理城工渡船二事民情愛戴引見復發山東攝福山補朝城大水大紳以災報大吏駁減其分數民感大紳雖未獲減徵亦無怨謗者大紳又力以病求去移攝青州府同知尋擢武定府同知捕蝗查賑並著勞勩以母老終養歸遂不出卒祀名宦

祠大紳素講學能文章在官公暇輒詣書院課士嘗訓諸生曰朱子小學爲作聖階梯入德塗軌必讀此書身體力行庶幾明體達用有益於天下國家之大於是士知實學風氣一變吳煥彩字蘊之福建安定人乾隆二十五年進士授山東范縣知縣民苦充牌頭吏列多名進以次需索煥彩革其弊清河水溢爲災其岸左高右卑因開五頃窪以瀉其東南築福金堤以防其西北歲得麥田四萬畝墾地民苦納租欲請免而格於例代輸租之半教之種番薯民困乃紓三十九年壽張逆匪王倫作亂距范縣四十里煥彩修城籌守禦力清保甲凡村落大小人民賢愚可指數有孟興璧者與黃昌吉等有隙上變列三十餘人朝命侍郎高樸與巡撫往察治使者出牒示煥彩曰某已死某爲某之父某之子皆良民呼之即至使者欲以兵往煥彩曰兵至愚民非死即走無可訊咎將誰執煥彩夜抵村中呼告之皆呼冤煥彩曰惟無其事必出就訊亟從我去不然禍立至民皆裹糧從使者按籍少二人煥彩曰一已死一外出已命其兄招之言未畢有跪門外者則已來矣訊之皆誣遂坐告變者巡撫曰知縣者知一

縣事君可謂之知縣矣知縣者民之父母君可謂之民之父母矣以卓異薦擢湖北鶴峯知州地本苗疆改流未久奸宄雜居煥彩勤於聽訟積弊一清土司族裔每借祖墳詐人財懲治之澆風自息民樸陋不知書設義塾資以膏火至五十三年始有舉於鄉者後以病歸鶴峯請祀名宦范縣亦爲建生祠年逾八十卒紀大奎字慎齋江西臨川人乾隆四十四年舉人充四庫館謄錄五十年議叙知縣發山東署商河會李文功等倡邪教誘民爲亂訛言四起大奎集縣民諭以禍福皆驚悟鄰郡惑者聞之亦相率解散補邱縣厯署昌樂棲霞福山博平民皆敬而親之父憂歸嘉慶中復出授四川什邡縣或謂什邡俗強梗宜示以威答曰無德可懷徒以威示何益奸民吳中友據山中聚衆積粟講清涼教大奎躬率健役夜半擣其巢獲忠友餘衆驚散下令受邪書者三日繳予自新民遂安擢台州知州道光二年引疾歸年八十卒祀台州名宦邵希曾字魯齋浙江錢塘人乾隆五十四年舉人嘉慶中官河南知縣歷權通許盧氏鄆陵西華沈邱太康扶溝淮甯新鄉皆有聲滑縣教匪之役司糧臺及匪平訊鞠俘

虜治餘匪凡良民被脅者皆得釋保全甚衆晚授桐柏民苦盜令村集建棚巡更鄉數家出一人爲門夫有警環集無事歸業訪捕強暴者繩以法積匪率遠徙慎於折獄皆速結訟日以稀朔望莅學集諸生講論增書院膏火親課之如師道光六年邑人王四杰始登進士第自明初以來所未有募錢萬緡建義學凡經塾三蒙塾十五擇其秀者入書院肄業文教興而悍俗漸化在任十年民安之老病大吏不令去卒於官

循吏三

張吉安 李毓昌

龔景瀚

蓋方泌 史紹登

李賡芸

伊秉綬

狄尙綱 張敦仁 鄭敦允

李文耕

劉體重 子煦

張琦 石家紹

劉衡 徐棟

姚柬之 吳均

王肇謙 曹瑾

桂超萬 張作楠 雲茂琦

張吉安字迪民江蘇吳縣人乾隆四十二年舉人六十年大挑知縣發浙江時清治各縣虧空責彌補富陽令憚敬獨不奉上官意旨檄吉安往摘印署事至則士民羣集乞留敬吉安見之默然徒手返白臺司曰憚敬賢吏乞保全之且州縣賦入有常經前官不謹致虧責彌補於後來者恐開培克之漸方今楚豫

奸民蠱起皆以有司貪殘爲口實宜用讀書人加意拊循乃無形之彌補耳聞者迂其言委攝縣丞及杭州府通判吉安自以不諧於時乞改教職上官留之嘉慶二年署淳安尋調象山海盜由閩擾浙沿海窮民業魚鹽者多以米及淡水火藥濟盜且爲嚮導吉安革船埠商漁之稅嚴禁水米出洋盜漸窮蹙值颶風覆盜艇泅至岸悉爲舟師所獲提督李長庚歎曰牧令盡如張象山盜不足平也又建議縣境南田爲海中大島宜如明湯和策封禁以斷盜翼韭山當海盜之衝石浦昌國兵力皆薄請增兵以資鎮懾事雖見格後卒如所議四年署新城漕倉設省城民輸折色縣官浮收運丁需索習以爲常吉安平其折價不及舊時十之六七民感之五年署永康蛟水猝發田廬蕩析爲棚廠以棲災民阻水者其舟饒之溺者具棺厝之不待申詳報可所以振卹者甚至上官或斥其有違成例巡撫阮元素重之悉如所請六年調署麗水竭誠禱雨旱不爲災縣多山民處險遠者艱於赴愬吉安輒巡行就山寺讞獄咸樂其便八年署浦江值水災奸民糾衆掠富室伐墓樹鄰邑咸煽動吉安曰非法無以止奸民非

米無以安良民良民安則奸民氣散請運兵米所餘以振之民心漸定乃擒首惡治如律補餘杭九年春雨傷禾糶倉穀以平米價又運川米千石濟之十年復被水分鄉設廠煮粥以振規畫詳密竟事無擁擠之擾邑多名區次第修復之懲訟師勤聽斷修志葺學文教不振在餘杭七年引疾歸遂不出歿後永康士民請祀名宦建立專祠當時吏治積弊有南漕北賑之說南利在漕相率諱災督撫藉詞酌劑置災民於不問苟有切求民瘼者轉不得安於位吉安官浙前後幾二十年所莅多災區皆能舉職在新城減漕之三四時論尤以爲難北賑之弊亦然同時江蘇知縣李毓昌以不扶同侵賑致禍仁宗優卹之重懲諸貪吏蓋欲以力挽頽風云毓昌字皋言山東即墨人嘉慶十三年進士以知縣發江蘇十四年總督鐵保使勘山陽縣賑事親行鄉曲鉤稽戶口廉得山陽知縣王仲漢冒賑狀具清冊將上揭仲漢患之賂以重金不爲動則謀竊其冊使僕包祥與毓昌僕李祥顧祥馬連升謀不可得遂設計死之毓昌飲於仲漢所夜歸而渴李祥以藥置湯中進毓昌寢苦腹痛而起包祥從後持其頭叱曰若

何爲李祥曰僕等不能事君矣馬連升解已所繫帶縊之伸漢以毓昌自縊聞
淮安知府王穀遣驗視之報曰尸口有血穀怒杖驗者遂以自縊狀上其族叔
李太清與沈某至山陽迎喪檢視其籍有殘稿半紙曰山陽知縣冒賑以利陷
毓昌毓昌不敢受恐負天子蓋上總督書稿諸僕所未及毀去者喪歸毓昌妻
有噩夢啟棺視面如生以銀鍼刺之鍼黑李太清走京師訴都察院命逮王穀
王伸漢及諸僕至刑部會訊山東按察使朱錫爵驗毓昌尸惟胸前骨如故餘
盡黑蓋受毒未至死乃以縊死也仁宗震怒斬包祥寘顧祥馬連升極刑剖李
祥心祭毓昌墓穀伸漢各論如律總督以下貶謫有差贈毓昌知府銜封其墓
御製愍忠詩命勒於墓上毓昌無子詔爲立後嗣子希佐賜舉人太清亦賜武
舉

龔景瀚字海峯福建閩縣人先世累葉爲名宦曾祖其裕康熙初以諸生從軍
援江西瑞州府通判滇閩變起率鄉勇爲大軍嚮導擢吉安知府時府城爲逆
將所據大軍駐螺子山其裕供餉無乏城復撫瘡痍多惠政後官河南懷慶知

府濬順利渠引濟水入城便民終於兩淮鹽運使歿祀瑞州吉安懷慶名宦祠
祖嶸初仕浙江餘杭知縣治縣民殺僕疑獄爲時所稱擢直隸趙州直隸州知
州濬河興水利再擢江蘇松江知府渡海賑崇明災黎全活甚衆官至江西廣
饒九南道單騎定萬年縣匪亂歿祀饒州名宦祠父一發乾隆十五年舉人官
河南知縣歷宜陽密縣林縣虞城四縣治獄明敏能以德化在虞城值水災勤
於賑卹朝使疏治積水醮爲惠民永便諸渠一發與災民共勞苦治稱最以病
去復起補直隸高陽擢雲南鎮南知州歿祀虞城名宦祠景瀚承家學幼即知
名大學士朱珪督閩學激賞之乾隆三十六年成進士歸班銓選四十九年授
甘肅靖遠知縣未到官總督福康安知其能檄署中衛縣判牘如流見者不知
爲初仕也七星渠久淤常苦旱景瀚築石壩遏水入渠始通流又濬常樂鎮靜
諸渠重修紅柳溝環洞及減水各牐溉田共三十萬畝民享其利五十二年調
平涼地磽瘠缺米粟景瀚請隣邑無馮糶又當西域孔道車馬取給商賈鹽引
勅派於民官吏強買煤炭皆爲民病一切罷之由是商賈輻輳食貨流通修柳

湖書院與諸生講學文風漸振五十五年署固原州漢回雜處時構衅景瀚密偵諸堡誅積匪境內以安五十九年遷陝西邠州知州嘉慶元年總督宜縣巡邊調景瀚入軍幕遂從勦教匪以功擢慶陽知府宜縣總轄三省從入蜀幕府文書皆屬景瀚尋調蘭州仍在軍充翼長景瀚從軍久見勞師糜餉流賊仍熾因上議備陳調兵增兵募勇三害勦賊四難謂先安民然後能殺賊民志固則賊勢衰使之無所裹脅多一民即少一賊民居奠則賊食絕使之無所擄掠民有一日之糧即賊少一日之食用堅壁清野之法令百姓自相保聚賊未至則力農貿易各安其生賊既至則閉柵登陴相與爲守民有恃無恐自不至於逃亡其要先慎簡良吏次相度形勢次選擇頭人次清查保甲次訓練壯丁次積貯糧穀次籌畫經費如是行之有十利反復數千言切中事理嗣是被兵各省舉仿其法民獲自保賊無所逞成效大著論者謂三省教匪之平以此爲要領五年始到蘭州任七年送部引見卒於京師其後續編皇清文穎仁宗特出其堅壁清野議付館臣載入祀蘭州名宦祠自其裕至景瀚四世皆祀名宦海內

稱之景瀚子豐穀官湖北天門知縣亦有治績不隳家聲焉

蓋方泌字季源山東蒲臺人嘉慶初以拔貢就職州判發陝西署漢陰廳通判石泉知縣三年署商州州同治州東百里曰龍駒寨寨之東爲河南南出武關爲湖北路四通多林莽山徑易憑匿時川楚教匪屢由武關入陝西方泌始至民吏掃地赤立賊酋張漢潮擁衆至乃置藥麵中誘賊刼食多死遂西走大軍乘之漢潮由是不振方泌集衆謀曰賊雖去必復來若等逃亦死守不得耕種亦死我文官無兵若能爲吾兵當全活爾衆曰惟命乃築堡聚糧戶三丁抽一得三千人無丁者以財佐糧糗兵械親教之戰辰集午散無廢農事四年賊屯山陽鎮安將東走河南迎擊敗之又擊賊於鐵峪鋪賊據山上而伏其半於溝乃分兵翦伏奪據東山上數乘懈擊之賊宵遁後賊由雒南東逸方泌馳至分水嶺間道走鐵洞溝出賊前伏待之賊錯愕迎戰遂敗斬首數百鄉兵名由是大振自武關至竹林關鄉兵皆請隸龍駒寨五年知州困於賊方泌馳百九十里至北灣賊驚曰龍駒寨兵至矣時賊屯州西及雒南山陽各萬餘人欲東出

方泌勒鄉兵二萬列三大營以待會官軍至夾攻賊大敗幾盡殲是役枕戈而寢者五十日游擊某誣以事解職大吏直之得留任賊遂相戒無過商州八年授盩厔知縣猶時時入山搜賊又獲寧陝倡亂者四十餘人境內甫定捐俸賑饑旌死節婦河灘馬廠鹽法皆區畫久遠擢寧陝廳同知仁宗召見問商州事甚悉擢四川順慶知府渠縣民變大吏屬以兵方泌曰此賽會人衆至各相驚疑訛言橫興非叛也捕十二人而變息調成都毋憂歸服闋授福建延平尋調臺灣兩署臺灣道屢讞大獄皆聚衆洶洶稍激則變方泌一以理論蔽罪如法道光十八年卒史紹登字倬雲江蘇溧陽人大學士貽直之孫以謄錄敍布政司經歷發雲南乾隆六十年署文水知縣時滇鹽歸官辦民苦抑配紹登弛其禁釋逋課者數百人閱三載配鹽之五十七州縣悉改商辦以文山爲法貴州苗亂距文山尙數郡紹登策其必至集胥役健者親教技擊以備之嘉慶元年苗竄鄰境之邱北潛與文山獠裸通紹登謂不救邱北文山獠裸必不靖親率三百人往人授刀一鐵鑣三十旣至當者輒仆邱北廓清而總督勒保勦苗失

利被圍於貴州黃草坪巡撫江蘭檄紹登往援至則賊圍數重內外不相聞七
戰皆捷乃達黃草坪會貴州援兵亦至比紹登上謁總督曰若文官亦遠來問
我耶紹登陳解圍狀不信紹登請視戰所賊尸鏢傷者文山民壯所擊若刃傷
請伏冒功罪總督初欲劾之勘實乃已巡撫聞紹登忤總督大懼令所用軍費
不得入報銷以是虧帑二萬尋兼署蒙自縣事兩城相距三百里交趾賊儂福
結粵匪犯文山紹登馳一晝夜入城率民壯出剿禽其渠峒卡悉復擢雲州知
州仍留文山任四年初彭齡來爲巡撫性好察開化總兵因蒙自變時怯懦爲
民所輕銜紹登譖之遂以虧空劾士民刊章臚紹登政績設醜釀金至三萬彭
齡聞之悔以完虧奏留任餘金無可返建開陽書院焉七年署維西廳通判廳
民恒乍縲爲亂巢險不可攻紹登廉得巢後巖壁陡絕阻大溪乃以篋爲緇募
善泅者繫緇巖樹對岸急引如笮橋攀援以登壯士三百人從之賊大驚亂擒
馘淨盡九年卒

李賡芸字鯽齋江蘇嘉定人少受學於同縣錢大昕通六書蒼雅三禮乾隆五

十五年進士授浙江孝豐知縣調德清再調平湖下車謁陸隴其祠以隴其曾
宰嘉定而已以嘉定人宰平湖奉隴其爲法盡心撫字訓士除姦邑中稱神明
嘉慶三年九卿中有密薦之者詔詢巡撫阮元元奏賡芸守潔才優久協輿論
爲浙中第一良吏引見以同知升用五年金華處州兩郡水災金華苦無錢處
州苦無米賡芸奉檄於恩賑外領銀二萬便宜爲之以銀之半易錢運金華加
賑人百錢而錢價平又以銀之半運米至處州減價糶轉輸而米亦賤升
處州府同知調嘉興海防同知署台州府尋擢嘉興知府正己率屬無敢以苞
苴進者治漕持官民軍三者之平上官每用其言十年水災減糶有實惠賑民
以粥全活者衆以繼母憂去官服闋補福建汀州調漳州俗悍多械鬪號難治
賡芸召鄉約里正問之曰何不告官而私鬪爲皆曰告官或一二年獄不竟竟
亦是非不可知先爲身累賡芸曰今吾在獄至立剖有不當更言之無所徇護
爲我告鄉民後更有鬪者必禽其渠焚其居毋恃賄脫衆皆唯唯退已而有鬪
者賡芸立調兵捕治悉如所言民大懼賡芸日坐堂皇重門洞開愬者直入命

役與俱召所當治者限時日不至則杖役至則立平之釋去即案前書獄詞無一錢費民皆懽呼曰李公活我漳屬九龍嶺多盜下所屬嚴捕擒其魁十數商旅坦行故事獲盜當甄敘悉以歸屬吏尋擢汀漳龍道二十年擢福建按察使署布政使逾年實授賡芸守漳州時龍溪縣有械鬪令懦不治署和平令朱履中內狡而外樸賡芸誤信之請以移龍溪久之事不辦始稔其詐洎署布政使改履中教職履中虧鹽課恐獲罪具揭於總督汪志伊巡撫王紹蘭謂虧帑由道府婪索督撫密以聞解賡芸職質訊賡芸之去漳監造戰船工未竣留僕督率之僕假履中洋銀三百圓詭以墊用告賡芸如數給之僕匿不以償福州知府涂以鞫鞠之阿總督意增其數爲一千六百逼令自承辭色俱厲賡芸終不肯誣服慮爲獄吏所辱遂自經事聞命侍郎熙昌副都御史王引之往按其獄得白上以賡芸操守清廉衆所共知其死由汪志伊固執苛求而成於涂以鞫勒供凌逼褫志伊職永不敘用以鞫履中俱譴戍黑龍江紹蘭亦以附和革職賡芸家不名一錢歿無以殮鹽法道孫爾準與之善爲經紀其喪初志伊亦重

清史稿 卷六
賡芸曾薦舉之及擢布政乘新輿上謁志伊諷以戒奢賡芸曰不肖爲大員不欲效布被脫粟之欺罔志伊素矯廉銜其語又以遇事抗執嫌益深及獄起履中忽自承妄奸諉原揭爲其僕竊印志伊怒必窮詰之論者謂漳廠修船例由龍溪縣墊欸藩司發欸至道乃償之非贓私也賡芸猶急負清名慮涉嫌不承而志伊峻待紳士不理於衆與賡芸善者或以飛語中之方治獄使者至閩士民上書爲賡芸訟冤感泣祭奠踵接於門爲建遺愛祠熙昌等據情奏請賜額表揚仁宗以大員緣事逮問當靜俟國法若此心皦然橫遭冤枉亦應據實控告朝廷必爲昭雪乃效匹夫溝瀆之諒殊爲褊急不應特予旌揚士民追思惠政捐資立祠斯則斯民直道之公聽之

伊秉綬字墨卿福建甯化人乾隆五十四年進士授刑部主事遷員外郎嘉慶三年出爲廣東惠州知府問民疾苦裁汰陋規行法不避豪右故練刑名大吏屢以重獄委之多所矜恤陸豐巨猾肆劫勒贖秉綬設方略縛其渠七人戮之六年歸善陳亞本將爲亂提督孫全謀不發兵秉綬乃遣役七十餘人夜搗其

巢禽亞本餘黨竄入羊矢坑未幾博羅陳爛展起事請兵提督復沮之秉綬爭
曰發兵愈遲民之傷殘愈甚提督不得已予三百人秉綬復曰偵虛實則三四
人足矣如用兵以寡敵衆徒債事耳提督不聽令游擊鄭文照率三百人往子
身跳歸亂遂成秉綬適以他事罷議去官士民顛留軍營時提督旣擁兵不前
其標兵卓亞五朱得貴均通賊縱掠爲僞渠帥秉綬憤懣請兵益力逢總督吉
慶之怒復以失察教匪論成會新總督倭什布至惠州士民數千人訴秉綬冤
上聞特免其罪捐復原官發南河授揚州知府時秉綬方奉檄勘高郵寶慶水
災刺一小舟棲戶枉渚必親閱手記及莅任劬躬率屬賑貸之事錙銖必覈吏
無所容其奸倡富商巨室捐設粥廠費以萬計誅北湖劇盜鐵庫子輩杖詭道
誑愚之聶道和它奸猾擾民者悉嚴治之民雖饑困安堵無惶惑厯署河庫道
鹽運使胥稱職尋以父憂去家居八年嘉慶二十年入都道經揚州卒秉綬承
其父朝棟學以宋儒爲宗在惠州建豐湖書院以小學近思錄課諸生在揚州
宏獎文學歿後士民懷思不衰以之配食宋歐陽修蘇軾及清王士禎稱四賢

祠

狄尙綱字文伯江蘇溧陽人寄籍順天乾隆四十六年進士五十七年授安徽黟縣知縣父憂去嘉慶四年起復發廣東署化州知州瀕海獷悍尙綱解除煩苛治以簡易補花縣以鄉兵助勦博羅亂匪有功旋攝香山十年銓授江西南康知府有武舉調族姪婦羞忿自盡以無告發事寢有年矣尙綱甫下車武舉以他事涉訟反覆詰問忽露前情窮究得實置諸法羣驚爲神不期年理滯獄百餘盡得情實饒州有兩姓爭田世相仇殺尙綱爲判斷調和爭端永息南安會匪李詳誥傳徒聚衆事發大吏檄尙綱案之戴奉飛實罪首詳誥爲從當減死承審同官以詳誥巨富欲引嫌尙綱曰無媿於中何嫌可避大吏亦慮與原奏不符尙綱曰不護前非乃見至公聖明在上何慮焉卒從其議株連者亦多省釋嘗言獄不難於無枉縱惟干證之牽累吏胥之需求受害者不可窮詰生平思此時用疚心又曰人知命盜巨案之當慎不知婚姻財產細務尤不可忽蓋必原情度勢使可相安於異日不釀成別故斯爲善耳南康治濱湖風濤險

惡宋郡守孫喬年築石隄百餘丈內浚二澳可泊千艘朱子知南康增築之名紫陽隄迤東水齧侵及城址明知府田瑄增築石隄百餘丈以衛之久俱圯尙綱增修兩隄一準舊制堅固經久蓼花池周五十里受廬山九十九灣之水北入湖水門淺隘尙綱疏濬之積潦消洩歲增收穀萬石在任先後二十四年所設施多規久遠厯署饒州吉安廣信三府攝糧道敝衣疏食不問生產引疾去官不能歸卒於南康張敦仁字古愚山西陽城人乾隆四十年進士授江西高安知縣調廬陵精於吏事有循聲遷銅鼓營同知署九江撫州南安饒州諸府事嘉慶初改官江蘇厯松江蘇州江甯知府六年調授江西吉安沿贛江多盜遴健吏專司巡緝責盜族禽首惡毋匿逋逃萑苻以靖民德之再署南昌尋實授所屬武甯民婦與二人私殺其夫前守以夫死途中非由婦姦報敦仁覆鞫詞無異而其幼子但哭不言疑之請留前守同讞遂得謀殺移尸狀獄乃定龍泉天地會匪滋事巡撫檄敦仁往按未至鎮道已發兵禽二百餘人民惶懼敦仁廉知匪黨與溫氏子有隙非叛逆法當未減坐爲首二人又會匪素肆掠富

室爲保家計多佯附實未身與事發株連囹圄爲滿訊察其寃盡得釋道光二年擢雲南鹽法道尋以病乞致仕敦仁博學精考訂公暇即事著述所刻書多稱善本寄寓江甯卒年八十有二著書遭亂多佚鄭敦允字芝泉湖南長沙人嘉慶十九年進士選庶吉士散館授刑部主事遷員外郎道光八年出爲湖北襄陽知府襄陽俗樸訟事多出教唆敦允長於聽斷積牘爲空訪所屬衙蠹莠民最爲民患苦者十餘人論如律地號盜藪請帑籌充緝捕費多設方略獲盜百餘巨盜梅杓者勇悍多徒黨捕者人少莫能近衆至則逸偵知所在夜往擒之其徒追者數百人令曰欲奪犯者殺而以屍與之衆不敢逼訴者屬集曰久不敢言言輒火其居敦允曰苦吾民矣遂寘之法棗陽地瘠民貧客商以重利稱貸田產折入客籍者多敦允許貸戶自陳子浮於母則除之積困頓蘇漢水齧樊城壞民居議甃石隄四百餘丈二年而成明年漢水大漲樊城賴以全襄陽岸高水下遇旱艱於引漑頒筒車式使民仿製民便之調署武昌會大水樊城石工掣損敦允固請回任修守襄人走迎三百里日夜牽挽而至議增築子

捻護隄根災民就食者數萬爲草舍居老疾稚弱令壯者赴工自食敦允昕夕
巡視工未竟致疾未幾卒祀名宦

李文耕字心田雲南昆陽人家貧事親孝服膺宋儒之學嘉慶七年進士以知
縣發山東假歸養母母喪服闋補鄒平到官四閱月不得行其志引疾去以官
累不得歸十九年教匪起壽張令以文耕嫻武事招助城守訓練防禦皆有法
賊不敢窺境大吏聞其幹略起復補原官在鄒平五年治尙教化民婦陳訴其
子忤逆文耕引咎自責其子叩頭流血母感動請釋卒改行聽訟無株累久之
訟者日稀善捕盜養捕役使足自贍無豢賊數親巡窮詰窩頓嘗曰治盜必真
心衛民身雖不能及者精神及之聲名及之終任盜風屏息課諸生親爲指授
勉以爲己之學民呼李教官又呼爲李青天調冠縣遷膠州濬雲墨二河道光
二年擢濟甯直隸州未之任巡撫琦善特薦之宣宗夙知其名即擢泰安知府
調沂州立屬吏程課謂官不勤則事廢民受其害教化本於身能對百姓然後
可以教百姓屬吏皆化之沂郡產檉樹勸民興蠶建義倉備荒捕盜如爲令時

尋擢兗沂曹道司河事修防必躬親屬廳請濬淤沙需銀五萬往視之曰無庸
春漲卽刷去矣果如其言五年遷浙江鹽運使未幾調山東時鹺業疲累充商
者多無籍遊民文耕知其弊請分別徵緩以紓商力責富商領運不得因引滯
賤價私賣課漸裕七年擢湖北按察使復調山東嚴治胥役詐贓犯輒置重典
斷獄寬平責屬吏清滯獄數月積牘一空謂山東民氣粗而性直易犯法亦易
爲善故教化不可不先居三歲調貴州州縣瘠苦希更調不事事適權布政使
請以殿最爲調劑俾久任專責成鑿桐梓葫蘆口以息水患黔產紬無綿布設
局教之紡織貧民艱生計重利而薄倫常撰文勸導曰家喻戶曉篇十三年休
致歸文耕平生以崇正學挽澆風爲己任在山東久民感之尤深歿祀名宦
劉體重山西趙城人乾隆五十四年舉人嘉慶初以知縣發湖南厯署石門新
化衡陽甯武衡山湘陰晉秩同知改江西道光中補袁州同知擢廣信知府調
吉安又調撫州所至有聲在撫州治績最著巡厯屬縣問民疾苦集父老子弟
勉以孝弟力田屬吏不職參劾無徇胥吏攬訟痛懲之厚書院廩餼課士以經

動繩以禮法遇大水盡心賑卹災不爲害建義倉積穀五萬石十四年擢河南
彰衛懷道筦河事修防有法終任黃流安瀾沁水隄由民築多單薄擇其要區
加築子捻籌歲修費垂永久漳河無隄防勤疏濬水患並息創建河朔書院仿
朱子白鹿洞規條以課三郡之士十九年擢江西按察使遷湖北布政使二十
二年乞病歸卒於家體重廉平不苟尤長治獄所居吏畏民懷訟獄日簡河北
士民尤感之歿祀名宦祠子煦由拔貢授直隸知縣歷權繁劇咸豐初遷開州
知州河決賑災全活數萬治團練有功署大名知府十一年春直隸山東匪迭
起守城四十日乘間出奇擊賊城獲安旣而東匪西竄勢甚張畿輔震動煦督
師破清豐賊壘乘勝進攻濮州老巢遇大雨賊決河自衛煦激勵兵團堅持不
懈賊窮蹙乞降遂復濮州開濮之間積水多沮洳土人謂之水套匪輒憑匿至
冬復豎旗起事煦率鄉團八千人追賊於冰天泥淖之中三戰皆捷水套底定
同治元年擢大順廣道命偕副都統撫克敦布辦理直東交界防勦事宜以勞
卒於官優詔賜卹大名及原籍並建專祠

張琦初名翊字翰風江蘇陽湖人嘉慶十八年舉人以謄錄議敘知縣道光三年發山東署鄒平縣抵任歲且盡閱四百七十村麥無種者即申牒報災親謁上官陳狀破成例請緩徵因鄒平得緩者十六州縣民失物誤訟鄰邑長山歸獄於琦琦曰汝失物地大樹北抑大樹南曰樹北琦曰若是則我界也民愕然曰誠鄒平耶即不欲以數匹布煩父母官持牒去後權章邱鄒平民時赴訴琦曰此於法不當受慰遣之章邱民好訟院司道府五府吏皆籍章邱走書請託倚撫短長琦任歲餘無一私書至結案二千有奇無翻控者五年補館陶會久旱風霾麥苗皆死饑民聚掠琦禱雨既應嚴捕倡掠者廉得富家閉糶居奇狀按治之民大悅乃請普賑兩月館陶地褊小賑數多鄰邑數倍大吏呵之尋有詔責問歲饑狀甚切乃按臨災區民迎訴賑弊惟館陶得實始劾罷他邑令厚慰琦士有訟者閱其辭不直則曰課汝文不至訟乃至耶先試以文不中程責後乃決事士訟遂稀館陶地斥鹵不宜穀又衛水數敗田琦精求古溝防及區田法試行之未竟病卒在館陶八年民愛戴之理訟不待兩造集即決遣之以

其辭質後至者莫敢狡飾有疑獄亦不過再訊胥吏擾民必嚴論如法然籌其
生計必周故無怨者琦少工文學與兄編修惠言齊名輿地醫學詩詞皆深造
五十後始爲吏治績尤著時江西同知石家紹亦儒者爲治有古風殆相亞云
家紹字瑤辰山西翼城人以拔貢爲壺關縣教諭道光二年成進士授江西龍
門知縣發奸摘伏以神明稱調上饒再調南昌首邑繁劇而盡心民事理訟嘗
至夜不輟連年水患饑民聞省會散賑屬聚郭外家紹與新建令同主賑始散
米令饑民自爨來者益衆賑所瀕河幾莫能容乃改散錢令各返鄉里候截留
漕米濟之時水災益棘家紹請開倉平糶復分廠煮粥以賑主者循例備三千
人食而就食者五萬洶洶不可止家紹至諭之曰食少人衆咄嗟不能辦汝等
姑退詰朝來不使一饑民無粥噉也衆皆迎拜曰石爹爹不欺人願聽處置爹
爹者江西民呼父也歷署大庾新城新建三縣擢銅鼓營同知署饒州贛州二
府所至皆得民心家紹口訥訥若不得辭自大吏僚友縉紳士民卒隸無不稱
爲循吏顧自視欲然嘗曰吏而良民父母也不良則民賊也父母吾不能民賊

也則吾不敢吾其爲民備乎十九年卒五縣皆祀名宦南昌民尤德之建祠於
百花洲

劉衡字廉舫江西南豐人嘉慶五年副榜貢生充官學教習十八年以知縣發
廣東奉檄巡河日夜坐臥舟中與兵役同勞苦俾不得通盜河道斂戢署四會
縣地瘠盜熾衡團練壯丁連村自保調捕會匪焚其籍以安反側祇治渠魁衆
乃定調署博羅城中故設徵糧店數家鄉又設十站民以爲累衡至即除之俗
多自戕里豪蠹役雜持之害滋甚衡釋誣濫嚴懲主使錮習一清補新興父憂
去服闋道光三年授四川墊江俗輕生亦如博羅衡先事勸諭民化之獲囑匪
初犯者曰饑寒迫爾給資使自謀生再犯不宥匪輒感泣改行調署梁山處萬
山中去水道遠歲苦旱衡相地修塘堰以時蓄洩爲永久之計捐田建屋養孤
貧歲得穀數百石上官下其法通省仿行尋調巴縣爲重慶府附郭號難治白
役七千餘人倚食衙前衡至役皆無所得食散爲民存百餘人備使令而已歲
歉衡謂濟荒之法聚不如散命各歸各保以便賑恤是年雖饑不害衡嘗謂律

意忠厚本之爲治求達愛民之心然愛民必先去其病民者故恆寓寬於嚴官民之阻隔皆緣丁胥表裏爲奸所至設長几於堂左右分六曹爲六樞吏呈案則各就所几樞吏之擊磬以聞衡自取立與核辦置之右几吏以次承領壅蔽悉除有訴訟坐堂皇受牘親書牒令原告交里正轉攝所訟之人到即訊結非重獄不遣隸勾攝即遣必注隸之姓名齒貌於籤又令互相保結設連坐法蠹役無所施技性素嚴臨訟輒霽顏俾得通其情扶不過十惟於豪猾則痛懲不稍貸嘗訪延士紳周知地方利害次第舉革待丞尉營弁必和衷時周其乏緩急可相倚城鄉立義學公餘親課之爲治大要以恤貧保富正人心端士習爲主總督戴三錫巡川東其旁邑民訴冤者皆乞付劉青天決之語上聞七年擢絳州直隸州知州宣宗召對嘉其公勤八年擢保寧知府九年調成都每語人曰牧令親民隨事可盡吾心太守漸遠民安靜率屬而已不如州縣之得一意民事也然所在屬吏化之無厲民者後擢河南開歸陳許道未幾病巡撫爲陳情及治蜀狀請優待之以風有位特詔給假調理久之病不愈遂乞歸數年始

卒博羅墊江梁山巴縣皆請祀名宦祠同治初四川學政楊秉璋疏陳衡循績並上遺書穆宗諭曰劉衡歷任廣東四川守令所至循聲卓著去官四十餘年至今民間稱道弗衰所著庸吏庸言蜀僚問答讀律心得等書尤爲洞悉閭閻休戚於興利除弊之道籌畫詳備洵無媿循良之吏將歷任政績宣付史館編入循吏傳以資觀感衡所著書皆閱歷有得之言當世論治者與汪輝祖學治臆說諸書同奉爲圭臬其後有徐棟著牧令諸書亦並稱焉棟字致初直隸安肅人道光二年進士授工部主事累遷郎中究心吏治以爲天下事莫不起於州縣州縣理則天下無不理稱州縣之職不外於更事久讀書多然更事在既事之後讀書在未事之先乃滙諸家之說爲牧令書三十卷又以保甲爲庶政之綱天下非一人所能理於是有鄉有保有甲自明王守仁立十家牌之法後世踵行爲弭盜設此未知其本也亦集諸說成保甲書四卷二十一年出爲陝西興安知府調漢中又調西安所至行保甲皆有成效興安臨漢江棟補修惠春石泉兩隄加於舊五尺民頗苦其役十數年後大水冒舊隄二尺乃感念之

肖像以祀舊禁運糧下游棟以興安卑濕積穀易霉變既不能久儲又不能出境圖利者改種菸葉藍靛歉年每至乏食乃弛運糧之禁民便之舉卓異二十九年以病歸咸同之間在籍治團練修省城有詔錄用以老病辭尋卒祀興安名宦祠

姚東之字伯山安徽桐城人七世祖文燮見本傳東之少負異才從族祖鼎學道光二年成進士授河南臨漳知縣屢決疑獄縣民張鳴武控賊殺妻稱賊攀二窗樞入室東之勘窗樞窄且夫未遠出詰之果夫因逐賊誤斫殺妻又常姚氏被殺罪人不得東之察其時爲縣試招覆之前夜所取第一名楊某不赴試疑之召至神色惶惑詢其居與常鄰乃夜至城隍廟命婦人以血污面與楊語遂得圖姦不從強殺狀每巡行鄉曲勸民息訟有訴曲直者即平之漳水溢齋糧赴災區且勘且賑全活者衆兼攝內黃民服其治鬧漕之風頓革境與直隸大名毘連多賊巢掘地爲窟積匪聚賭排槍手爲拒捕計東之約大名會捕賭窟除而盜風息母憂去十二年服闋補廣東揭陽瀕海民悍械鬪擄掠抗賦戕

官習以爲常東之訓練壯勇集紳耆於西郊諭以保護善良與民更化最頑梗之區曰下灘盜賊土豪相勾結束之會營往捕拒者或死或擒一盜積犯十八案召被害者環觀倖之境內稱快有凶盜居錢坑其地四面皆山不可攻潮州故事凡捕匪不得則爇其廬空其積聚東之戒勿焚燒召耆老諭交犯不敢出乃乘輿張蓋入村從僅數人見耆老一一慰勞皆感泣願更始民在四山高望者咸呼好官次日遂交犯自下灘示威錢坑示德恩信大著收穫時巡鄉爲之保護樹催科旂植械鬪則樹止鬪旂一日塗遇持火槍者結隊行望見官至悉沒水中命以漁網取之訊爲助鬪者按以法自此械鬪寢止興復書院厚待諸生回鄉以新政告鄉人有變則密以聞官民無隔閼逋賦者相率輸將強梗漸化縣大治遷連州綏徭廳同知民徭構訟判決時必使相安遂無事普甯縣匪徒戕官肆劫奉檄從鎮道往捕治匪以涂祥爲巢穴磨盤山爲聲援地皆險乃設方略正軍攻涂祥調揭陽壯勇自磨盤嶺突進破賊巢獲六百餘人事定言官誤論劾朝使查勘其誣得白十七年署肇慶府端溪大漲城不沒數版東之

日夜立城下守禦預放兵糧以平米價民不知災十九年擢貴州大定知府俗好訟束之速訊速結不能售其欺期年而訟稀白蟒洞地僻產煤鐵有汪擺片者據其地聚衆結會爲一方害捕滅解散地連川滇得弭鉅患焉大定民苗雜居宜治以安靜大吏下令束之必酌地方之宜不使累民見多不合遂引疾歸數年始卒吳均字雲帆浙江錢塘人嘉慶二十四年舉人道光十五年大挑知縣發廣東授乳源調潮陽歷署揭陽惠來嘉應海陽在海陽捕雙刀會匪黃悟空寘之法舉卓異署鹽運司運同擢佛岡廳同知署潮州知府咸豐二年惠州土匪肆劫均奉檄往獲匪千餘分輕重懲治遂肅清二年實授時東南各行省軍事亟福建湖南大吏聞均名先後奏調往襄勦匪廣東方倚爲保障堅留之四年江南大營散兵回粵結匪爲亂賊首陳娘康擁衆圍潮陽分黨陷惠來攻普甯援軍失利均親督戰敗賊甫解潮陽圍海陽彩陽鄉匪首吳中庶乘間糾黨陳阿拾煽衆旬日至萬餘人大掠海陽偪攻郡城澄海匪首王興順亦與合均檄潮陽令汪政分兵援郡城戰城下殲賊數千圍解自移軍澄海冒雨破賊

巢分路搜捕清餘孽旋克惠來斬陳娘康等於陣未幾以積勞卒於官均性清
介治潮最久誅盜尤嚴每巡鄉輒以二旂開導大書曰但願百姓回心免試一
番辣手化莠爲良保全彌衆從役有取民間絲粟者立斬馬前民益畏服在潮
陽以濱海地鹹鹵開渠以通溪水築隄六千餘丈淡水溉田瘠土悉沃在海陽
濬三利溪加築北堤爲郡城保障及守潮州修復州東廣濟大橋附郭西湖山
高出城上登瞰全城如指掌舊有高墉爲犄角久圯均築展新城跨濠而過圍
山於城內至是匪亂圍攻竟不能破民咸頌之歿後追贈太僕寺卿光緒間潮
州建專祠

王肇謙字琴航直隸深澤人道光十四年舉人授福建海澄知縣馬口鄉民搆
釁互掠親諭利害積嫌頓解捕巨盜許疇寘諸法羣盜斂迹富紳爭產累訟男
婦數十人環跪堂下援引古義喻之更反自責衆赧然謂今日始知禮義訟以
是止邑民李順發負楊茄柱金爲楊所留乃以刦財訴諸教堂教主移牒請嚴
究衆洶洶肇謙白上官茄柱無罪不必治教士驕心不可長總督劉韻珂嘉其

抗直閩縣上篁村故盜藪檄肇謙往捕至則召其父老開陳大義曰我來活若
一鄉若列銃拒官大府欲屠之尙不知耶衆大恐肇謙曰某某皆大盜速縛來
三日繕齊保甲冊吾保若無事遂立以盜獻廈門洋人因賃屋與民齟齬奉檄
往治據理剖決兩無所徇洋人帖服咸豐二年署上杭時粵匪據江甯福建賊
林俊遙應之陷漳州永春大田諸郡縣肇謙建礮儲粟製器械簡丁壯爲堅壁
清野計賴以無虞三年淫雨爲災且賑且治軍率團勇越境勦松源縣賊四千
擢永春直隸州知州募鄉兵二萬破林俊於城南山擒土匪邱師辜八等署漳
州知府漳浦古竹社蔡全等爲亂肇謙設方略約內應生擒全詔嘉之晉秩知
府漳俗獷悍難治肇謙謂民不奉法由吏不稱職課所屬清案牘勤催科懲械
鬪嚴緝捕表義行振文教以能否爲殿最漳人以爲保障署延建邵道調署興
泉永道未行粵匪竄入境肇謙誓以死守督軍隨按察使趙印川十三戰皆捷
以勞卒詔贈光祿寺卿祀上杭名宦祠曹瑾字懷樸河南河內人嘉慶十二年
舉人初官直隸知縣歷署平山饒陽甯津皆得民心賑饑懲盜多惠政補威縣

調豐潤以事落職尋復官發福建署將樂又以失察邪教被劾引見仍以原官用道光十三年署閩縣旗兵與民械鬪持平曉諭利害皆帖伏值旱迎胡神於鼓山禱雨官吏奔走跪拜街衢間瑾斥其不載祀典獨屹立不拜大吏奇之以爲可任艱鉅時臺灣歲歉多盜遂補鳳山問疾苦詰盜賊剔除弊蠹順民之欲淡水溪在縣東南由九曲塘穿池以引溪水築埤導圳凡掘圳四萬餘丈灌田三萬畝定啟閉蓄洩之法設圳長經理之二十年擢淡水廳同知海盜剽劫商賈漳泉二郡人居其間常相仇殺又當海防告警瑾至行保甲練鄉勇清內匪而備外侮英吉利兵艦犯鷓籠口瑾禁漁船勿出絕其鄉導懸賞購敵酋民爭赴之敵船觸石禽百二十四人屢至屢却之明年又犯淡水南口設伏誘擊俘漢奸五敵兵四十九人事聞被優賚未幾和議成英人有責言總督怡良知瑾剛直謂曰事將若何瑾曰但論國家事若何某官無足重罪所應任者甘心當之但百姓出死力殺賊不宜有負怡良歎曰眞丈夫也卒以是奪級後以捕盜功晉秩以海疆知府用瑾遂乞病歸數年始卒

桂超萬字丹盟安徽貴池人道光十二年進士以知縣發江蘇署陽湖四十日巡撫林則徐賢之補荆溪未任父憂去十六年服闋援直隸欒城捕盜不分畛域每於隣邑交界處破賊巢盜風息濬波河金水河及城河通溝洫平道路水潦無患限紳戶免役不得過三十畝免累民勸樹畜修井糞田種薯芋以備荒復書院設義塾化導鄉民習異教者多改行調萬全署豐潤值英吉利犯天津沿海戒嚴超萬訓練鄉勇募打鴨善槍法者以備戰後粵匪犯畿輔天津練勇效超萬法頗收鳴槍狙擊之效詔舉賢吏總督訥爾經額薦超萬持躬廉謹盡心民事遷北運河務關同知二十三年擢授江蘇揚州知府揚俗浮靡超萬勵勤儉嚴禁令凡衙蠹營兵地棍訟師諸害民者悉繩以法訟於府者一訊即結逾兩年調蘇州時漕弊積重大戶短欠且得規包納運丁需索日增官民交困超萬爲減幫費均賦戶之議乃訪懲豪猾示均收章程依限完納卽赦既往請大吏奏定通行積困稍甦屯佃求減租聚衆毆業主糧艘水手因行海運失業勾結滋事勢皆洶洶超萬處以鎮靜先事戒備得弭亂萌署糧儲道二十九年

擢福建汀龍漳道乞病歸咸豐中粵匪擾安徽超萬在籍治鄉團同治初福建巡撫徐宗幹薦之署福建糧儲道尋擢按察使年八十卒於官張作楠字丹邨浙江金華人嘉慶十三年進士銓授處州府教授擢江蘇桃源知縣調陽湖治事廉平人稱儒吏道光元年擢太倉直隸州知州三年大水作楠冒雨履勘災鄉問民疾苦停徵請賑借帑平糶疏濬境內河道以工代賑水得速洩涸出田畝不誤春耕人刊婁東荒政編紀其事尋奉檄赴松江讞獄鄉民訛傳去官慮仍收漕紛紛奔訴會瀕海奸徒乘間蠢動作楠聞變馳回中途檄主簿蕭翮赴茜涇捕首惡脅從罔治事遂定作楠勤於治事案無滯牘暇則篝燈課讀妻女紡織常至夜分人笑其爲校官久未改故態五年擢徐州知府受代以平糶虧帑二萬金彌補未完作楠自危巡撫陶澍曰救災民如哺兒失乳即死吾方咎汝請糶時顧慮折耗不兌稍稽遺大投艱者胡亦泥此且紳民已代致萬金不汝責也徐州亦被災籌賑甚力民賴以甦在任兩載乞養歸鄉居二十餘年足迹不入城市三子皆令務農工或問何不仍業儒曰世俗讀書爲科名及入仕

則心術壞吾不欲其墮落也作楠精算學貫通中西在官以工匠自隨製儀器
刊算書所著書匯刻曰翠微山房叢書行於世學者奉爲圭臬焉卒祀鄉賢祠
雲茂琦廣東文昌人道光六年進士授江蘇沛縣知縣詢民疾苦懇懇如家人
勸以務本分忍忿爭訟頓稀縣地卑多積潦開濬溝洫歲獲屢豐籌緝捕經費
獲盜多給重賞盜賊屏迹課諸生先德行後文藝語以身心性命之學隣邑聞
風而來書院齋舍至不能容總督蔣攸銛稱其有儒者氣象調六合連年大水
災民得賑無流亡邑多淫祀毀其像改書院衛田多典質爲清理復業運戶得
所津貼漕累以紓考最入覲改官兵部郎中又改吏部未幾告養歸家居十數
年設田贍族鄉邑興革無不盡力主講課士有法卒祀名宦祠

循吏四

徐台英

牛樹梅

何曰愈

吳應連

劉秉琳

陳崇砥
蕭世本

夏子齡

李炳濤

俞鍾俊

朱根懋
王懋勳

蒯德模

林泉達

方大湜

陳豪

楊榮緒

林啓

王仁福

朱光第

冷鼎亨

孫葆田

柯劭懋

涂官俊

陳文猷

李素

張楷

王仁堪

徐台英字佩章廣東南海人道光二十一年進士授湖南華容知縣俗好訟台英謂訟獄糾纏由於上下不通與民約傳到即審結胥役需索者痛懲之一日閱呈詞不類訟師胥吏筆鞫之果諸生也拘至試以詩文文工而詩劣諭曰詩本性情汝性情卑鄙宜其劣念初犯姑宥其改行其人感泣去規復沱江書院

月自課之曰陸清獻作今日與諸生講學吾不曉講學若教人作文因而誘之讀書立品是吾志也縣田有圻田坵田山田之分瀕湖地旱少潦多坵圻例有蠲緩田無底冊影射多書役墊徵官給空票花戶糧數任其自注役指爲欠者拘而索之官不知所徵之數保戶包納漕米相沿以爲便挾制浮收無過問者積欠數萬官民交病台英知其弊乃清田冊注花戶糧數姓名住址立碑坵上使冊不能改應緩應徵者可親勘而影射之弊絕申糧隨業轉之例即時過割而飛洒之弊絕收漕分設四局俾升合小戶就近輸民免保戶之加收而包納之弊絕坵田舊有堤修費出田主有挪坵田作圻田冀免隄費者有賣田留稅派費賠累者有賣稅留田派費不至者隄費不充一坵隄潰他坵同希豁免凡借帑修隄者久無償相率亡匿台英丈田均費低窪者許減派不許匿畝其人戶俱絕歸宗祠管業承費巨族有抗者罪之行之期年隄工皆固逋賦盡輸調耒陽耒陽徵糧由櫃書里差收解取入倍於官刁健之戶輕良善之戶重民積忿有楊大鵬者以除害爲名欲揭竿爲亂事平台英遂盡革里差時上官欲命

舉甲長以代里差仍主包收包解台英以甲長之害與里差同因集鄉紳問之曰巡撫命汝等舉甲長何如曰無人願充台英曰甲長所慮在不知花戶住址汝等所慮在甲長包收吾今併戶於村分村立冊以各村糧數合一鄉以四鄉糧數合一縣各村納糧就近投櫃糧入串出胥吏不得預甲長祇任催科無昔日包收之害此可行否衆皆拜曰諾台英曰隱匿何由核衆曰取清冊磨對有漏補入可耳曰虛糧何由墊曰虛糧無幾有則按畝勻攤可耳數月而清冊成糧法大定大鵬之亂誘脅者多台英禁告許一縣獲安以憂去官同治元年詔起用發浙江署台州知府未任卒

牛樹梅字雪橋甘肅通渭人道光二十一年進士授四川彰明知縣以不擾爲治決獄明慎民隱無不達咸愛戴之隣縣江油匪徒何遠富糾衆劫中壩場地與彰明之太平場相近樹梅率民團禦之匪言我不踐彰明一草一木也迨官軍擊散匪衆遠富匿下莊白鶴洞恃險負隅遙呼曰須牛青天來吾即出樹梅至果自縛出擢茂州直隸州知州尋署甯遠知府地大震全城陷沒死傷甚衆

樹梅壓於土獲生蜀人謂天留牛青天以勸善樹梅自咎德薄不能庇民益修省所以賑卹災黎甚厚民愈戴之父憂去官咸豐三年尙書徐澤醇薦其樸誠廉幹詔參陝甘總督舒興阿軍事八年湖廣總督官文薦循良第一發湖北病未往同治元年四川總督駱秉章復薦之擢授四川按察使百姓喜相告曰牛青天再至矣三年內召以老病不出主成都錦江書院時甘肅回匪尙熾樹梅眷念鄉里遺書當事論勦回宜用土勇略云軍興以來劇寇皆南勇所掃盪今金積堡旣平河州水土尤惡若參用本省黑頭勇其利有六飽粗糲耐冰霜一也有父母兄弟妻子之仇有田園廬墓之戀二也給南勇半餉即樂爲用三也無歸之民收之不致散爲賊四也久戰狄河一帶不費操練五也地勢熟習設伏用奇無意外虞六也後總督左宗棠採其說主用甘軍卒收其效光緒初歸里卒年八十四何曰愈字雲咳廣東香山人父文明河南洧川知縣有惠政曰愈少隨父宦讀書勵志有幹材道光初授四川會理州吏目土司某桀驁所部夷人殺漢民知州檄曰愈往驗以賄乞免却之乃率衆來劫不爲動卒成驗而

還獄上大吏廉得直曰愈由是知名捐升知縣以習邊事辦西藏糧臺二載還補岳池縣不畏強禦豪右斂戢練鄉團繕城郭庀器械逾數年滇匪犯岳池後令賴所遺械以拒賊時比張孟談之治晉陽云調署平山以母憂去咸豐六年服闋甯遠府野夷出巢焚掠大吏檄曰愈參建昌鎮軍事川西裸夷凡數十支自雷波我邊滇南二十四塞頻年肆擾值西昌縣告變曰愈馳至衆大譁曰夷傷吾人曰愈曰若等平日欺夷如鹿豕使無所控告故釀禍今且少息吾爲若治之乃集兵練出不意搗夷巢夷皆匍匐聽約束漢民屋毀粟罄夷請以山木供屋材並貸穀爲食曰愈諭民曰此見夷人具有天良若等毋再生釁漢民遂相安曰愈旣益悉夷番之情僞山川之險隘擬綏邊十二策格不得上未幾滇匪韓登鸞糾衆入會理州境聲言與回民尋讐回民疑漢民召匪因焚民居曰愈率一旅往聞流言奸細伏城內乃下令毋閉城三日後按戶搜查容奸細者從軍法越三日城內外賊黨悉遁曰愈曰吾不閉門不遽搜者正開其逃路耳衆皆服遣人持榜文諭登鸞遵示釋怨退去復持諭回民回民曰昔日被水災

田廬盡沒何公一騎渡水賑我又爲我濬河至今無水患戴德未忘今敢不遵諭違者誅之自是回民亦不擾州境事定鎮府上其功會有攘之者遂不敘比粵匪犯蜀曰愈數陳機宜當事不能用退居灌縣後歸卒於家子璟官至浙閩總督吳應連江西南城人道光元年舉人以知縣揀發四川歷署天全涪州永川安岳蒲江新津綿竹仁壽諸州縣補石泉調彭縣宦蜀先後二十年所至修塘堰濬河渠平治水陸道塗捕盜賊土豪撫災民皆有實政咸豐初蜀匪漸熾應連在彭縣編團儲械以備不虞四年卒於官未幾悍匪迭來犯賴鄉勇保全危城民思遺績留殯於城內三忠祠旁歲時祀之涪州安岳永川石泉仁壽先後請祀名宦祠

劉秉琳字崑圃湖北黃安人咸豐二年進士授順天寶坻知縣持躬清苦恤孤寡懲豪猾悉去雜派及榷酤贏餘者索倫兵伐民墓樹縱馬躡田禾反誣村民繫其馬秉琳力爭得直蝗起督民自捕集資購之被蝗者得錢以代賑且免踐田苗遷宛平京縣十年英法聯軍犯京師秉琳奉檄赴營議犒納刀韉中慮以

非禮相加義不受辱抗論無少屈犒具皆如議尋引疾歸穆宗登極有密薦者復至直隸署任邱民以驛車爲累籌資招雇永除其害擢深州直隸州知州七年擒匪張總愚竄畿輔且至人勸其眷屬可避秉琳曰吾家人皆食祿者義不可去授兵登鄆鄉民及隣境聞之咸挈入保至十餘萬人嬰城四十餘日賊圍之不破秉琳上書統帥言賊入滹沱河套勢益蹙宜兜圍急擊緩將偷渡東竄卒如其言寇平優敘州地多斥鹵民以鹽爲恆產課與常賦埒水旱不得報災非漉鹽無以應正供秉琳議官銷法以杜私販民悅服九年擢正定知府滹沱溢發所儲兵米以賑築曹馬口迴水斜角三堤水不齧城民用安集郡與山西接壤固關守弁苛稅煤鐵商販委物於路聚衆上訴秉琳往解散除其重征鎮將獲盜三已誣服秉琳鞠之乃兵挾負博嫌疑贓刑逼以成其獄釋三人者而重懲其兵光緒元年擢天津河間道兼轄南運河工請復歲修銀額河兵口食足乃無偷減工料之弊築中亭河北隄涸出腴田千餘頃時方旱流民集天津設粥廠躬親其事所活甚衆嘗太息曰哺飢衣寒救荒末策也本計當於河渠

書農桑譜中求之四年乞病歸數年卒同治初年軍事漸定始課吏治大學士曾國藩爲直隸總督下車卽舉賢員如李文敏任道鎔李秉衡後並至巡撫秉琳及陳崇砥夏子齡蕭世本諸人治行皆卓著當時風氣爲之一振云崇砥字亦香福建侯官人道光二十五年舉人咸豐三年大挑知縣發直隸授獻縣盜賊充斥嚴緝捕渠魁多就擒治鄉團十六區合千五百人分班輪值邑以有備捻匪張錫珠擾畿輔崇砥開城納逃亡誓衆效死縣境臧家橋爲通衢河間守欲毀橋阻賊崇砥謂方宜安集難民遙爲聲援豈可夷險示弱且委東鄉於賊非計也竟不毀橋賊旋引去大學士祁雋藻疏薦之擢保定府同知筦水利崇砥以府河港汊紛岐苦易淤設水誌增夫役器具以時汰淤商船打壩阻水爲設壩船給板樁過淺構橋咸稱便同治八年署大名知府兵亂時民多築寨堡自衛後事定寢至藏奸抗官崇砥親履勘收繳軍械易正紳司之澆風漸息畿南久苦旱賑難普及崇砥議有田十畝以上者不賑極貧大口錢千小口半之壯者不給先編保甲造細冊不曰賑而曰貸事畢奏請蠲貸民安之南樂縣民

抗徭聚衆令告變崇砥輕騎往平其輕重衆歡然輸納副將駐兵獻縣兵不戢鄉團疑其匪也戕副將既而知誤畏罪衆聚不散檄崇砥往治令縛首禍者脅從皆免之調署順德府尋擢河間知府河間素多訟崇砥剋期審結數決疑獄期年而清滹沱下游爲災崇砥請築古洋河隄自獻縣至肅甯六十里於蔡家橋作隄防支流開溝六千丈以資宣洩自馮家村至高且口造橋建牖防子牙河暴漲於是古洋通流近地皆大稔光緒元年卒於官祀名宦夏子齡字百初江蘇江陰人道光十六年會試第一成進士初官禮部主事任事果決尙氣節庫丁賄當事請準捐考力持駁議時稱之改授河南汲縣知縣勤聽訟嚴治盜遇事持大體咸豐初詔求人才巡撫潘鐸特薦之會母憂去官服闋授直隸深澤調饒陽比歲旱蝗盜劫肆擾選健役百人教以技擊更番直有事雖午夜立率以出捕劇盜幾盡分境內團練爲八區輪期會操久之皆可用十年英法聯軍入京師畿南土匪蜂起冀州王洛悅河間劉四賈滌等各屬集千人連擾郡邑子齡率團勇迎擊境上斬獲數百劉四受創遁王洛悅聞風驚潰劉四等尋

於他縣被擒伏法王洛悅亦就撫事平優敘縣舊爲滹沱所經北徙已久十一年上游決溢水驟至近郊爲澤國訪尋故道濬老澗溝上接安平境下入獻縣之廉頗窪以資宣洩次年水復至暢流不爲患城西官道沖刷成河建長橋五十丈民便之遷宛平京縣擢易州直隸州知州西陵在州境故事護陵俸餉及祭品牛羊芻豆州領帑給之陵員與州吏因緣爲侵蝕數煩朝使察治子齡與守陵大臣議訂章程弊去秦甚始相安焉歲旱奸民聚衆擾大戶立杖斃煽衆者勸捐賑卹災不爲害同治六年河北馬賊起擾及鄰境募勇治團如饒陽時匪懾其名不敢犯次年擒匪竄擾畿輔守要隘清內匪防軍久駐有淫掠者立斬以徇闔境肅然論功晉秩知府美利堅教會私購民居爲耶蘇堂執條約與爭以其無游歷執照購屋未先告州境附近陵寢有關風水皆與約背竟退價撤契且杜其後至尋請離任以知府候補未幾卒易州饒陽並祀名宦祠子詒鈺官永年知縣亦以廉平稱有治績世本字廉甫四川富順人同治二年進士選庶吉士散館授刑部主事改直隸知縣先在籍治團練有聲曾國藩莅直隸

辟爲幕僚九年天津民教相鬩斃法國領事幾肇大釁遂以世本署天津縣尋實授天津民悍好鬥鍋夥匪動爲地方害世本嚴懲之地爲通商大埠訟獄殷繁世本手批口鞫斷決如神逾年父憂去服闋仍補天津歲旱災黎就食萬數給粥施醫無失所調清苑擢遵化直隸州知州復以母憂去服闋以知府候補筦天津守望局捕誅大盜王洛八謝昆海道肅清倡修運河隄以免水患疏瀦龍河故道開范家隄及石碑河宣惠河金沙嶺下水道四十餘里皆藉賑興工民利賴之署天津正定兩府十三年卒附祀曾國藩祠

李炳濤字秋槎河南河內人咸豐中就職州判謁曾國藩於軍中尋佐皖軍營務能調和將士積功晉同知留安徽同治四年國藩北征捻匪炳濤上書言四事一專責防堵以嚴分竄一聯絡民團以孤賊勢一設局開荒以資解散一多備火器以奪賊長國藩頗採其言檄查亳州圩炳濤微服出入盡得諸匪徒姓名及蠹役胡采林通匪虐民狀誘采林誅之竿其首一州驚懼自是訟獄者咸取決於炳濤按圩查閱立條教別良莠戮悍賊二百予自新者三千期年而俗

變無盜竊者五年擒匪竄州境曉諸圩以大義雖與寇有親故者無敢出應擒
匪引去六年署蒙城縣蒙亳接壤瘠苦尤甚炳濤勸強梗撫良懦振興書院絃
誦聲作擒匪餘黨解散及各軍凱撤還鄉者數千人彈壓安輯民用晏然巡撫
英翰疏陳炳濤治行爲安徽第一被詔嘉獎十年調署亳州尋擢廬州知府廬
州故劇郡中興以來元勛宿將相望豪猾藉倚聲勢爲不法官吏莫敢誰何炳
濤嚴治之稍戢無爲州江隄官督民修炳濤禁胥吏索規費工必覈實府東施
河口爲衝途冬涸商船以數牛牽挽始行時值旱災以工代賑濬河深通運賑
者皆至商民便之西洋人欲於城內立教堂成有日矣炳濤諭地主曰爾不聞
甯國之變耶他日民教有爭端爾家首禍其人懼事得寢光緒二年大江南北
訛言有妖術剪人髮者民情洶洶奸民藉以倡團立卡多苦行旅炳濤徧示城
邑無妄動誅一眞匪其疑似者悉不問人心旋定三年母憂去官皖南興辨保
甲墾荒大吏奏調炳濤主其事五年卒於甯國炳濤機警善斷獄在蒙城營馬
爲賊所劫乃傳諭詰旦城但啟一門見有馬奔出有鞍而無轡命羈之俄一人

手持一封將出城回顧者再縛之發其封則轡與刼物皆在其人伏罪在亳州田父報子夜投井死驗無傷井旁有汲水器炳濤念夜非取水時既願死何暇持器詢其婦無戚容偵其平日與鄰婦往來拘鄰婦鞫之果得狀蓋鄰婦弟與婦通欲害其夫適其夫以事忤父鄰婦邀醉以酒而投之井置汲器者欲人信其取水投井也於是皆伏法時皖北被兵久撫輯遺黎多賴良吏炳濤爲最又有俞澍朱根仁鄒鍾俊王懋勳並爲時所稱澍直隸天津人以縣丞發安徽襄壽春鎮軍事咸豐六年署蒙城知縣時縣城初復人烟寥落招集流亡以大義激紳民築城籌守禦趨工者踴躍不費公家一錢捻渠苗沛霖反側叵測窺縣城十餘次不能破城有內應賊者捕斬三人而賊退七年攻賊於豐墟擒其酋徒成德等八年攻克龍元賊壘捻酋孫葵心來犯出奇計擊走之附近捻墟懾於聲威往往反正受約束九年實授先後敘功晉同知直隸州在官數年潔己愛民及歿民皆痛哭送其柩二千里歸葬詔贈道銜建專祠根仁字禮齋江蘇常熟人以州判從軍晉秩知縣留安徽同治三年署定遠兵燹初定徵調尙繁

清史稿
前令試辦開徵根仁以民不堪命請緩之籌備供億民無所擾捕巨猾雍秀春未獲得黨羽名冊根仁曰我何忍興大獄以博能名喪亂未平民氣未固激之生變可勝誅乎遂火其冊聞者爲之改行跼雞岡周姓聚旅居有從逆者已死里人利其田廬致周族人於獄根仁一訊釋之後再署定遠捻匪擾境根仁修城濬隍聚糧固守暇輒輕騎巡鄉勸民修復陂堰十家治一井田二頃闢一塘旱不爲災歷署阜陽懷甯捕阜陽積匪程黑置之法補全椒興水利有實政光緒四年卒鍾俊字雋之江蘇吳縣人同治中以州判官安徽積勞晉秩知縣補太平平反冤獄慈祥而人不欺墾荒勸農蒿菜盡闢不追呼而賦辦邑行淮鹽與浙引接界屢以緝私釀大獄乃請以官牒領鹽試辦分銷民始安修復水利興書院儲書七萬卷輯儒先格言曰人生必讀書訓士敦本行旌節孝修祠祀舉行賓興鄉飲酒禮在任五年以興養立教爲務調太和歷署懷甯六安阜陽蕪湖渦陽所至有聲光緒中乞休卒於家清貧如故子嘉來官至外務部尙書守其家法焉懋勳字弼丞湖北松滋人咸豐中以議敘縣丞發安徽從軍有功

晉知縣歷署穎上合肥亳州泗州補六安直隸州知州因事去職尋因籌賑捐獎以知府候補懋勳先後官安徽近五十年任亳州泗州皆三次初至亳捻匪苗沛霖初平清查戶口收繳軍械平毀寨堡數百民始復業懲械鬥清積案釐學產復書院士民戴之以父憂去會巡撫過境州人萬衆乞留懋勳巡撫許以俟服闋重任後如其言夾道歡迎光緒初洊飢煮粥以賑河南山西陝西飢民流轉入境留養資遣全活無算泗州瀕洪澤湖爲匪藪捕誅劇盜數十閭閻得安治獄無株連禁差保擾民勸農事勵風化親歷鄉曲民隱悉達最後至泗距前已二十餘年盜賊聞風遠竄奸胥皆避歸田野宣統元年卒

蒯德模字子範安徽合肥人咸豐末以諸生治團練積功洊保知縣留江蘇同治三年署長洲時蘇州新復盜日數發德模偵之輒獲有匿鎮將營者親往擒以歸寘之法車渡民聚衆抗租或欲懾以兵德模曰是激之變也扁舟往治首惡散脅從事立平治有天主堂雍正間鄂爾泰撫蘇改祠孔子泰西人伊宗伊以故址請德模曰某官可罷此祠非若有也卒不行奸人誘買良家女倚勢豪

清史稿
卷之六
六

爲庇德模挈女親屬往出之豪亦屈服其不畏強禦類此常周行鄉陌田夫走卒相酬會周知民隱馭下嚴而恤其私胥役奉法不敢爲蠹附郭訟獄故繁日坐堂皇判決間用俳語鈎距發摘豪猾屏息然執法平不爲繳刻上官遇疑獄輒移鞫治多所平反治長洲四年判八百餘牘盡愜民意或播謠謠焉江北大水災民麇集德模請於大吏分各縣留養三萬餘人無失所民有爲飢寒偷竊者設化莠室給衣食使習藝藝成遣歸爲澣墅關營籌芻秣費永免比閭供役修望亭塘爲橋二十八以利行旅兵燹之後百廢待舉壇廟倉庾書院善堂祠宇及先賢祠墓率先修復不足則斥俸助之徵漕舊有淋尖踢斛花邊樣米捉猪諸色日又有截串差追諸弊一皆革除不追呼而賦辦惟大小戶均一便於民而不便於紳御史朱鎮以浮收劾奏事下按治總督曾國藩巡撫郭柏蔭奏雪之詔以是非倒置切責原奏官旋署太倉直隸州知州蘇州知府九年調署鎮江時天津民擊斃法蘭西領事豐大業沿江戒嚴德模至則葺外城浚甘露港召還居民之聞警遠徙者人心始定調署江甯未幾擢四川夔州知府府城

濱江屢圯於水修築輒不就德模自出方略築保坎十三道登以方丈大石層累而上捐萬金以倡其役不二年遂成附郭有臭鹽磧盛漲則沒水水落貧民相聚煎鹽嗣爲雲陽竈戶所持請封禁然冬令私煎如故聚衆抗捕無如何德模請弛禁官買其鹽運銷宜昌不奪奉節貧民之業不侵雲陽銷引之岸遂著爲令勸民種桑奉節一縣二十二萬株他邑稱是在夔四年卒於官長洲太倉夔州皆祠祀之林達泉字海巖廣東大埔人咸豐十一年舉人江蘇巡撫丁日昌辟佐幕府留心經濟每論古今輿圖武備及海外各國形勢厯厯如指掌日昌雅重之同治三年粵匪餘孽竄廣東達泉歸里練鄉勇籌防禦大埔得無患叙績以知縣選用七年隨勦山東捻匪有功晉直隸州知州發江蘇八年署崇明知縣亂後彫敝達泉革陋規清積獄修城垣浚河渠建橋梁置義塚增書院膏火設同仁育嬰堂利民之政知無不爲及去任父老遮道攀留其後兵部侍郎彭玉鑾巡閱過境見老者飢踣於道與之食曰若林公久任於此吾邑豈有飢人哉十一年署江陰城河通江湖又縣境東橫河關農田十餘萬畝灌溉之

利亂後皆淤塞大浚之建義倉勸捐積穀所定章程歷久遵守光緒元年授海州達泉先奉檄勘海沐鹽河請以工代賑下車次第舉辦浚甲子河及玉帶河復橋路增隄防民咸稱便州地瘠民貧素爲盜藪達泉時出巡擒巨憝寘之法土宜棉設局教民紡績廣植桐柏雜樹於郭外錦屏山所規畫多及久遠時方經營臺灣船政大臣沈葆楨疏薦達泉器識宏遠潔己愛民請調署新設之臺北府格於部議特詔從之達泉至陳治臺諸策議建置減徵收整飭防軍招民墾荒皆因地制宜事事草創積勞致疾四年丁父憂以毀卒

方大湜字菊人湖南巴陵人咸豐五年以諸生從巡撫胡林翼軍中浚保知縣授廣濟縣清保甲治團練盜賊屏息築盤塘石堤下游數縣皆免水患十年土匪何致祥等謀結皖賊襲攻官軍大湜偕員外郎閻敬銘馳往擒之十一年皖賊竄湖北黃州德安諸屬縣先後陷廣濟亦被擾大湜被吏議革職留任調署襄陽飛蝗徧野大湜躡屨持竿躬率農民撲捕三日而盡濬城南襄水故道渠成涸復田數萬畝同治初巡撫嚴樹森疏陳大湜政績優異復原職八年擢宜

昌知府九年大水難民避高阜絕食兩日大湜捐資煮粥糜又爲饋飪數萬賑之諭米商招民負米日致數十石計口散給災戶無失所攝荆宜施道十年調武昌樊口有港蜿蜒九十餘里外通江內則重湖環列周五百里江水盛漲由港倒灌近湖居者苦之僉請築壩樊口以禦江水大湜謂閉樊口則湖水無所洩環湖數縣受其害上下江堤亦危力持不可光緒五年再署荆宜施道尋擢安襄鄖荆道歷直隸按察使山西布政使八年開缺另候簡用遂乞病爲言者所劾鐫級歸大湜生平政績多在爲守令時所至興學校課蠶桑事必親理胥吏無所容奸民親而信之時周歷民間一吏一擔夫自隨即田隴間判訟守武昌時勘隄過屬縣暮宿民家已去而縣官猶不知嚴義利之辨嘗曰以利誘者初皆在可取不可取之間偶一爲之自謂無損久則顧忌漸忘自愛者當視爲醜毒飢渴至死不可入口又曰居官廉如婦人貞節不過婦道一端若恃貞節而不孝不敬不勤不慎豈得謂賢乎公暇輒讀書所著平平言及蠶桑捕蝗修堤區田諸書皆自道所得歸田後謂所親曰官至兩司不如守令之與民親措

置自如也遂不出卒於家陳豪字藍洲浙江仁和人同治九年優貢以知縣發
湖北光緒三年署房縣勤於聽訟每履鄉恆提榼張幕憇息荒祠與隸卒同甘
苦會匪柯三江謀亂立禽寘之法置甌縣門諭脅從自首杖而釋之徵米斗斛
必平不留難不挑剔民大悅刁紳感而戢訟禁種鶯粟募崇陽人教之植茶咸
賴其利歷署應城蘄水授漢川頻年襄河溢修築香花垸彭公垸天興垸諸堤
疏濬茶壺溝縣河口以工代賑新溝者毘漢陽冬涸舟澀江口奸民輒恃衆索
詐捕治諭禁之因病乞休沐將去任有淹訟久未決慮貽後累畀胡床至廳事
判定兩造感泣聽命值年飢發賑大吏知豪得民心強起力疾往民夾道懽呼
賑未半復以疾去尋署隨州素多盜豪如治房縣時置甌令自首選賢紳行保
甲盜風頓戢俗多自戕圖詐豪遇訟實究虛坐不稍徇澆風革焉立輔文社選
才雋者親教之多所成就治隨二年瀕行聞代者好殺竭數晝夜之力凡獄情
可原者悉與判決免死後因養母乞免歸浙中大吏輒諮要政多所匡益家居
十餘年卒豪在隨州重修季梁祠及卒隨人思其德於西偏爲建遺愛祠祀之

楊榮緒字黼香廣東番禺人咸豐二年進士選庶吉士授編修擢御史英法聯軍犯京師駕幸熱河榮緒與同官抗疏請回鑾又劾參贊國瑞飭法營私風裁頗著同治二年出爲浙江湖州知府粵匪據湖州四年時甫克復荒墟白骨闐無人煙榮緒置善後局規畫庶政安集流亡閭閻漸復屬縣糧冊無存榮緒招來墾闢試辦開徵歲有起色湖蠶利甲天下經亂桑盡伐課民復種貧者給以桑苗絲業復興郡稱澤國滙天目諸山之水入太湖烏程長興境內舊有溲港各三十六以爲宣洩亂後多淤塞五年榮緒奉檄開濬至八年麤畢烏程溲港尤易淤賴設閘以禦湖水之倒灌九年重修諸閘因經費不充頻年經營猶未盡也十年內閣侍讀學士鍾佩賢疏陳其事朝命大加濬治時榮緒舉卓異入覲宗源瀚代攝郡源瀚亦能事規畫舉工及榮緒回任集絲捐得鉅款以資興作屏去僣從輕舟巡驗常駐湖濱踰年工始竣以溲港旋開旋淤議定分年疏濬之法及鑿蘆撈淺閘版啟閉章程數十年遵守不輟又開碧浪湖疏北塘河及城河葺學校建考舍修書院建倉庫造橋梁復育嬰堂百廢具舉鞠獄詳審

吏胥立侍相更代終日無倦容親受訟牒指其虛謬曰勿爲胥吏所用也手書牒尾輒數百言剖析曲直人咸服之訟以日稀刑具朽敝隸役坐府門賣瓜果自活客坐無供張儉素如布衣時遠近頌爲賢守在任十年嗣爲人所譖遂求去捐升道員離任尋卒郡人思之請祀名宦祠林啟字迪臣福建侯官人光緒二年進士選庶吉士授編修督陝西學政馭士嚴正任滿遷御史直言敢諫稽察祿米倉不受陋規爲時所稱十九年出爲浙江衢州知府多惠政二十二年調杭州除衙蠹通民隱禁無名苛稅餘杭巨猾楊乃武因姦通民婦葛畢氏興大獄刑部訊治倖免重罪歸則益橫攬訟事挾制官吏莫敢誰何啓捕治之乃武控京師不爲動卒論如法尤以興學爲急務時各行省學堂猶未普立杭郡甫建求是書院啟復養正書塾並課新學舊有東城講舍益振興之兼經義治事陰主程朱之說而變其面目誘諸生研尋義理以成有用一時優秀之士皆歸之又以浙中蠶業甲天下設蠶學館於西湖講求新法成效頗著遇國外交涉事持正無遷就遠人亦心服治杭四年剛直不阿喜接布衣士民翕然頌之

卒官葬於孤山林處士墓側杭人歲設祭焉號曰林社久而勿輟啟之治杭得友高鳳岐爲之助後官廣西梧州知府亦有聲歿而杭人附祀於林社云

王仁福字竹林江蘇吳縣人少誠慤勇於任事祖宦河南歿後仁福扶柩歸葬道經徐州遇捻匪徒步率廝役出入烽火肩行四十里竟免尋入賞爲東河同知粵匪犯開封城壕沙淤如平地仁福奉檄督工濬治尅期蒞事而賊至城守賴之同治五年署祥河廳同知黃河自北徙中原多故工帑大減頻年軍事亟發帑復不以時歲修不敷隄埽殘缺料無宿儲祥河汛地當衝險工迭出人皆視爲畏途仁福盡力修守不避艱危六年秋汛水驟漲掣埽去如削木柿仁福奔走風雨泥淖中搶護歷七晝夜款料俱竭隄岌岌將破居民蟻附隄上仁福對之流涕曰我爲河官擠汝等於死我之罪也當身先之躍立埽巔風浪捲埽走入大溜沈沒河聲如吼隄前水陡落風止浪定大溜改趨殘隄得保衆咸驚爲精誠所格令善泅者覓其尸不得乃以衣冠斂事聞詔依陣亡例賜卹附祀河神祠朱光第字杏簪浙江歸安人少孤貧幕游江南奉汪輝祖佐治藥言爲

圭臬咸豐末捻匪方熾佐蕭縣令籌防禦屢破賊都統伊興額上其功累晉秩知州分發河南佐獻局治獄平光緒中補鄧州在任三年大稜之後壹意休養善治盜民戴之王樹汶者鄧人爲鎮平盜魁胡體安執爨鎮平令捕體安急乃賄役以樹汶僞冒致之獄既定讞臨刑呼冤重鞫則檄光第逮其父季福爲驗開歸陳許道任愷先守南陽嘗讞是獄馳書阻毋逮季福且誘怵之光第曰吾安能惜此官以陷無辜竟以季福上則樹汶果其子巡撫李鶴年袒愷持初讞益堅河南官科道者交章論其事命東河總督梅啟照覆訊樹汶猶不得直衆論大譁刑部提鞫乃得實釋樹汶自鶴年啟照以次譴黜有差而光第已先爲鶴年撫他事劾去官貧不能歸卒於河南後鄧州士民請祀名宦以子祖謀官禮部侍郎格於例不行

冷鼎亨字鎮雄山東招遠人同治四年進士卽用知縣發江西署瑞昌地瘠而健訟鄉愚輒因之破家捕訟師及猾吏數人繩以法因事詣鄉使胥役盡隨輿後反則令居前而已殿之未嘗以杯勺累民調署德化懲防軍之陵民者境內

肅然修瀕江堤塘費省工速德化瑞昌黃梅三邑民爭蘆州累歲相鬥殺鼎亨
諭解之建臺於門所官吏誓不私民皆悅服白鶴鄉人叔與姪爭田即樹下諭
解遂悔悟如初旱蝗起徒步烈日中掩捕經月露宿禱神得雨蝗皆死歷署新
昌彭澤皆有實政上官以爲賢調補新建附省首邑官斯者多听夕伺上官不
違治民事鼎亨先與上官約屏酬應親聽斷民歌頌之尋調鄱陽值大水發賑
親勘給印票盡除侵蝕舊習次年復災跣足立沮洳中溼疾徧體十閱月常小
舟行駭浪中屢瀕於危深夜返署理訟牘侍郎彭玉鑾巡江過境寄書巡撫曰
某所至三江五湖數千里未見堅剛耐苦如冷知縣者也歷官十年食無兼味
妻子衣履皆自製以廉率下胥吏幾無以爲生俸入輒捐爲地方興利訓士以
氣節爲先鄱陽俗好鬥鼎亨曰化民有本未教而殺之非義也以孝經證聖祖
聖諭廣訓爲淺說婦孺聞之皆感動治教案必持平屢遇民教齟齬事桀黠者
欲借以鼓衆毀教堂慮遺禍好官而止蓋有以感之光緒十年擢南昌府同知
巡撫潘霽疏薦入覲遂乞歸卒於家

孫葆田字佩南山東榮成人同治十三年進士授刑部主事改知縣銓授安徽宿松勤政愛民日坐堂皇妻紡績室中蕭然如寒士調合肥大學士李鴻章弟子之僂人橫於鄉以逼債毆人死葆田檢驗屍傷觀者數萬人恐縣令爲豪強迫脅驗不實葆田命仵作曰敢欺罔者論如律得致命狀人皆謹噪謂包龍圖復出讞遂定有御史劾葆田誤入人死罪詔巡撫陳彝按之卒直原讞葆田遂自免歸名聞天下逾數年安徽將清丈民田巡撫福潤疏調葆田主其事辭不赴貽書當事言清丈病民陳清賦之要熟地報荒者當寬其既往限年墾復平歲報災者當警其將來分年帶徵弊自可除無事紛擾時以爲名言葆田故從武昌張裕釗受古文法治經實事求是不薄宋儒歷主山東河南書院學者奉爲大師巡撫張曜疏陳其學行賜五品卿銜中外大臣迭薦之詔徵不出宣統元年卒年七十柯劭愨字敬儒山東膠州人光緒十五年進士即用知縣亦官安徽署貴池補太湖貴池自粵匪亂後地丁冊爲吏所匿託言已燬徵賦由吏包納十不及四五而浮收日甚民苦之劭愨知其弊令花戶自封投櫃吏百計

撓之不爲動民輸將恐後增收銀二萬餘兩民所節省數且倍巡撫鄧華熙初聽浮言將奏劾總督劉坤一曰柯令皖中循吏奈何登於彈章華熙悟遂疏薦送覲晉秩直隸州劭懃爲治清簡斷獄明決所至民愛戴亦績學善爲古今體詩時與葆田並稱儒吏

涂官俊字劭卿江西東鄉人光緒二年進士截取知縣發陝西署富平涇陽長安諸縣補宜君山邑地瘠民樸官此者多不事事官俊勸農桑興水利成稻田數百畝躬巡阡陌與民絮語如家人調涇陽厯官皆有聲凡兩任涇陽政績尤著初至值回亂後清積訟千餘庶政以次規復期年而改觀龍洞渠故白渠也官俊倡言開濬衆議以工鉅爲難獨毅然爲之由梯子關而下水量增三分之一復於清洽河畔修復廢渠二水所不至者勸民鑿井以濟之先後增井五百有餘無旱憂涇民多逐末不重蓋藏義倉無實儲官俊謂積穀備荒莫善於年出年收躬詣各鄉勸諭捐穀嚴定收放之法民感其誠輸納恐後倉皆充實十一年旱荒全活凡數萬人編保甲捕盜賊地方靖謐官俊故績學立賓興堂置

性理經濟有用之書日與諸生講習增義塾定課程親考校之凡有利於民者爲之無不力二十年卒疾篤時猶強起治事捐俸千金以恤孤貧民爲祠歲時祀之陳文獻湖南長沙人以諸生入貲爲通判同治間從軍積功晉同知留陝西光緒七年署鄠縣知縣以教化爲先政平訟理九年授留壩廳同知廳獄舊有棗茨經費歲徵之民文獻革之境內無質庫貧民稱貸盤剝者要重息文獻設裕民公所貸民錢息以十一取其贏以備公用民便之廳境山多於田無物產以資生乃周歷山谷辨其土宜作種橡說及山蠶四要徧諭鄉民頒給樹秧蠶種募工導之絲成製機教織設局收買重其值以招之又購紫陽茶種課之樹藝於是地無棄利俗素樸陋歲科試附鳳縣額每試或不得一人建書院義塾置書籍延高才者爲之師數年之後橫舍彬彬遂請奏設廳學建官置額谿河多壅閼橫溢爲患陳開河策未果行值水猝發已逾報災例限便宜開倉賑之跋涉沮洳勞疾不輟煮粥賑近郊多所全活久之流民至集復申開河議以工代賑不得請則因其衆治道路濬溝渠出私錢給值負累至數千緡民感其

德廳介萬山中林谷深阻奸民狙伏行劫或掠婦孺賣境外文黻密圖其處示捕役時復微服迹之多就禽治實行保甲於民戶職業田產丁口年歲婚嫁載冊不厭煩瑣及賑飢稽之冊如家至戶覲訴訟亦莫敢欺事益簡焉民有殺子婦匿其屍者母家以無左驗不得直文黻偶行山徑羣鴉噪於前索而得之一訊具服人以爲神十八年調署潼關廳未任卒李素字少白雲南保山人同治六年舉人光緒初授陝西商州直隸州知州值州境歉收飢民聚掠時山西大稜商州爲轉運要衝素招民運賑糧使飢者得食集資數萬緡購籽糧散給設粥廠十餘所災後倉儲一空捐穀萬石六年大水加意撫卹災不爲害州城濱丹河遇盛漲則負郭田廬漂沒城中亦半爲澤國素創築石隄二百餘丈城門月隄十餘丈遂無水患開州東隸花河山路三十餘里州西麻壩嶺山路二十餘里行旅便之擴充商山書院延碩儒課士設義塾三十餘區絃誦聞於比戶陋規病民者悉除之每歲寒冬出私錢給孤寡緝捕籌經常之費綠營餉薄歲資助之凡賑飢積穀築堤修城興學莫不以鉅資倡一署同州知府先後在官

十八年兩舉卓異以病免歸卒士民感之多私祠祀焉

張楷字仲模湖北蘄水人同治十年進士選庶吉士授編修累遷至侍講光緒初疏論伊犁事又請撤銷總兵周全有卹典爲時所稱八年出爲浙江金華知府永康山中七堡八堡地險僻盜藪也楷設方略捕誅匪首蔣元地移縣丞駐山麓獷俗一變父憂去服闋補山西汾州汾陽平遙兩縣瀕河鄉民冬令攔河築堰引水灌田水不得暢流夏秋漲溢各築護隄以鄰爲壑輒械鬥蔓訟楷禁築攔河堰濬引渠以洩水患紓而訟息以南方戽水法導民使開稻田植桑課蠶有山曰黑烟與交山葫蘆峪相連匪徒窟穴其間偵其姓名掩捕盡獲之治汾州七年考績爲山西最調太原未任母憂去服闋補河南府鞏洛之間素多盜捕治巨魁椎理斂迹治獄多平反調開封二十五年畿輔拳匪亂起大河南北羣情洶洶大吏持重不敢決楷力陳邪教不可信外衅不可開揭示義和團既號義民謂能避槍礮令詣城外空營候試以槍擊果不入編伍充兵奸民不得逞聯軍入都潰兵南下楷創議守河自汜水迄蘭儀嚴稽渡口凡持械之士

悉阻之不令入城屬境安堵論者謂微楮之堅定中原禍未艾也事定開缺以道員候補三十年卒

王仁堪字可莊福建閩縣人尙書慶雲之孫光緒三年一甲一名進士授修撰督山西學政歷典貴州江南廣東鄉試入直上書房時俄羅斯索伊犁使臣崇厚擅定條約仁堪與修撰曹鴻勛等合疏劾之太和門災復與鴻勛應詔陳言極論時政其請罷頤和園工程謂工費指明不動正款夫出之筦庫何非小民膏血計臣可執未動正款之說以告朝廷朝廷何能執未動正款之說以謝天下言尤切直十七年出爲江蘇鎮江知府甫下車丹陽教案起由於教堂發見孩尸仁堪親驗孩尸七十餘具陳於總督劉坤一曰名爲天主教堂不應有死孩骨即兼育嬰局不應無活嬰兒傳教約本無准外國人育嬰之條教士於約外兼辦育嬰不遵奏行章程使地方官得司稽察禍由自召請曲貸愚民之罪以安衆心別給撫卹之費以贍彼族坤一迂之卒定犯罪軍流有差時外使屢責保護教堂仁堪請奏定專律謂條約無若何懲辦明文每出一事任意要挾

宜明定焚毀教堂作何賠償殺傷教士作何論抵以及口角鬥毆等事有定律
可遵人心既平訛言自息英人梅生爲匪首李鴻購軍火事覺領事坐梅生罪
僅監禁仁堪上書總理各國事務衙門論之又洋人忻愛珩徧謁守令募捐義
學無游厯護照仁堪請關道送領事查辦復議無照私入內地應按中國律法
科罪雖皆未果行時論躉之郡地多岡壠旱易成災仁堪以設渠塘爲急務不
欲擾民捐廉爲倡馳書乞諸親舊商富感而輸助得錢三萬緡開塘二千三百
有奇溝渠閘壩以百計十八年秋丹陽大稜恩賑之外勸紳商捐資全活甚衆
又假官錢於民使勿賣牛名曰牛賑濬太平港沙腰河練湖越瀆蕭河香草簡
瀆之屬凡二十餘所支溝別渠二百三十有奇又鑿塘四千六百以蓄高原之
水皆以工代賑東西百餘里間水利畢舉次年春賑畢餘四萬金生息備積穀
牛賑餘錢仿社倉法創社錢按區分儲爲修溝洫廣義塾之用郡西鄉僻陋不
知學立榛思文社以教之出私錢於府治前建南濡學舍在任兩年於教養諸
端盡力爲之調蘇州已積勞致疾日坐讞局清積案風采動一時甫三閱月猝

病卒時論惜之鎮江士民列政績籲請大吏上聞謂其視民事如家事一以扶
植善類培養元氣爲任卓然有古循吏風詔允宣付史館立傳以表循良自光
緒初定制官吏歿後三十年始得請祀名宦於是疆臣率徇衆意輒請宣付立
傳表章曠典日致猥濫仁堪爲不愧云